

MESYUARAT KETIGA, PENGKAL KETIGA  
PARLIMEN KEEMPAT BELAS  
2020

**HARI SELASA : 24 NOVEMBER 2020**

**JAWAPAN-JAWAPAN BAGI PERTANYAAN-PERTANYAAN JAWAB  
LISAN YANG TIDAK DIJAWAB DI DALAM DEWAN  
( SOALAN NO. 6, 11 HINGGA NO. 58 )**

**NOTA: [RUJUK PENYATA RASMI HARIAN (HANSARD)]**

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KE-EMPAT BELAS**

**PERTANYAAN : LISAN**

**DARIPADA : TUAN AWANG HUSAINI BIN SAHARI  
[ PUTATAN ]**

**TARIKH : 24 NOVEMBER 2020 (SELASA)**

**SOALAN**

Minta **MENTERI PENGANGKUTAN** menyatakan adakah pendirian berkenaan dengan permohonan Persatuan Pemandu Limosine Lapangan Terbang Antarabangsa Kota Kinabalu untuk diberi kebenaran menggunakan aplikasi E-hailing, memandangkan pendapatan mereka terjejas akibat aktiviti Grab di Lapangan Terbang Antarabangsa Kota Kinabalu.

**JAWAPAN**

**Yang Di-Pertua,**

1. Untuk makluman Yang Berhormat, Kementerian Pengangkutan melalui Lembaga Pelesenan Kenderaan Perdagangan (LPKP) Sabah tiada halangan dan menyokong permintaan Persatuan Teksi Lapangan Terbang Limosin Lapangan Terbang Antarabangsa Kota Kinabalu (LTAKK) untuk menggunakan platform e-hailing sebagai alternatif dalam operasi mereka. Untuk makluman, perkara ini telah dimaklumkan kepada pihak persatuan melalui beberapa siri pertemuan di antara LPKP Sabah dan pihak persatuan sejak tahun 2018 lagi. LPKP Sabah juga tiada halangan sekiranya pihak persatuan ingin mewujudkan e-hailing sendiri atau menyertai mana-mana platform e-hailing sedia ada.

2. LPKP Sabah berpandangan, sekiranya pihak persatuan menyertai platform e-hailing, ianya bukan sahaja dapat menambah pendapatan malah dapat bersaing dengan operasi kenderaan e-hailing sedia ada. Selain daripada Kelas Lesen Lapangan Terbang, LPKP Sabah juga menyarankan supaya semua kelas lesen teksi di Negeri Sabah untuk menyertai platform e-hailing sebagai operasi alternatif kelas lesen ini memandangkan permintaan kepada perkhidmatan e-hailing amat menggalakkan.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN YUSUF BIN ABD. WAHAB  
[ TANJONG MANIS ]**

**TARIKH : 24 NOVEMBER 2020 (SELASA)**

**SOALAN**

**TUAN YUSUF BIN ABD. WAHAB [ TANJONG MANIS ]** minta **MENTERI ALAM SEKITAR DAN AIR** menyatakan bilakah pembinaan struktur penahan ombak akan dibina di kawasan terhakis seperti di Pantai Paloh, Sebako dan kawasan utara Pulau Bruit memandangkan kejadian hakisan pantai semakin teruk dan menjejaskan penempatan penduduk kampung.

**JAWAPAN**

**Tuan Yang Di-Pertua,**

1. KASA melalui Jabatan Pengairan dan Saliran (JPS) Malaysia mengambil perhatian dan memandang serius masalah hakisan pantai yang berlaku di seluruh Malaysia. Masalah ini perlu ditangani secara berperingkat memandangkan kos bagi melaksanakan kaedah mengawal hakisan pantai seperti pembinaan *groyne*, penambakan pasir, pembinaan benteng batu mahupun membina pemecah ombak bagi mencegah hakisan pantai adalah sangat tinggi.

2. Keseluruhan pantai negara adalah 8,840km termasuk pulau-pulau. Pada tahun 1985, Jabatan Pengairan dan Saliran (JPS) telah menjalankan Kajian Hakisan Pantai Negara (*National Coastal Erosion Studies – NCES*) dan kajian tersebut telah dikemaskini pada tahun 2015. Tujuan kajian ini dijalankan adalah untuk mengenalpasti tahap hakisan

pantai seluruh negara dan dinilai dari pelbagai aspek seperti aspek hakisan dan juga pembangunan di kawasan pantai.

3. Berdasarkan Laporan NCES JPS pada tahun 2015, garis pantai yang mengalami hakisan di Malaysia adalah sepanjang 1,347.6 km dan sepanjang 55.4 km sedang mengalami masalah hakisan pantai yang serius dan kritikal pada Kategori I iaitu kadar melebihi 4 meter setahun. Oleh itu, kerja-kerja pembinaan struktur pengawalan hakisan pantai dilakukan secara berperingkat mengikut tahap keseriusan hakisan.

4. Berdasarkan kajian NCES JPS 2015 juga, status hakisan pantai bagi kawasan Pulau Bruit, di dapati berada di antara Kategori 2 dan 3. Kementerian memandang serius masalah hakisan yang berlaku di kawasan Ahli Yang berhormat dan Kementerian melalui JPS telah memohon Projek Pengawalan Hakisan Pantai Kampung Paloh Lama, Daerah Tanjong Manis, Bahagian Mukah, Sarawak dalam RMKe-12.

5. Untuk makluman Ahli-ahli Yang Berhormat, secara keseluruhannya, kerajaan telah meluluskan kos projek pembangunan pencegahan hakisan pantai dalam RMke-11 sebanyak RM2 billion untuk Semenanjung Malaysia, RM 145.56 juta untuk Sarawak dan RM 8 juta untuk Sabah.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN WONG LING BIU [SARIKEI]**

**TARIKH : 24 NOVEMBER 2020 (SELASA)**

**SOALAN**

**TUAN WONG LING BIU [SARIKEI]** minta **MENTERI KESIHATAN** menyatakan sebelum vaksin untuk COVID-19 ditemukan bagaimanakah langkah pihak Kementerian untuk menyembuhkan majoriti pesakit yang dijangkiti penyakit bahaya itu di negara kita.

**JAWAPAN**

**Tuan Yang di-Pertua,**

1. Sejak kemunculan pandemik COVID-19, Kementerian Kesihatan Malaysia (KKM) telah **membangunkan protokol rawatan COVID-19 yang dikemaskini** berdasarkan **saranan badan antarabangsa** seperti Pertubuhan Kesihatan Sedunia (*World Health Organization* - WHO), kajian saintifik dan keberkesanan rawatan ke atas pesakit-pesakit di Malaysia dan di luar negara.

2. **Sehingga kini tiada ubat khusus bagi merawat COVID-19.** Protokol rawatan terkini berpandukan tahap klinikal COVID-19, status klinikal pesakit, keputusan ujian makmal dan radiologi serta pelan rawatan pesakit.

3. Pelan rawatan bagi pesakit COVID-19 di Malaysia adalah berdasarkan 5 tahap klinikal iaitu:

Tahap 1 : Tidak bergejala

Tahap 2 : Bergejala tanpa radang paru-paru

- Tahap 3 : Bergejala dengan radang paru-paru  
Tahap 4 : Bergejala dengan radang paru-paru dan memerlukan bantuan oksigen  
Tahap 5 : Pesakit kritikal dengan penglibatan *multiorgan*

4. Secara amnya, kesemua pesakit COVID-19 akan diberikan **rawatan simptomatik bagi merawat gejala pesakit tersebut seperti contoh pemberian ubat demam serta penjagaan nutrisi yang optimal dan penjagaan sistem peredaran darah yang seimbang**. Pemantauan gejala dan perkembangan pesakit juga dipantau dengan rapi **melalui pemeriksaan darah dan pengimejan mengikut keperluan pesakit**. Pemberian beberapa jenis ubatan yang lebih spesifik adalah berdasarkan tahap klinikal pesakit. Di antara ubatan yang termasuk di dalam protokol rawatan bagi pesakit COVID-19 adalah seperti berikut:

- i. **Rawatan Antiviral, Antibiotik dan *Immuno-modulatory*;**  
Ubat Antiviral seperti contoh Favipiravir dan ubat *Immuno-modulatory* seperti contoh Dexamethasone yang berfungsi untuk memperbaiki respons sistem pertahanan tubuh. Ubat Antibiotik diberi jika pesakit disyaki atau disahkan mendapat jangkitan bakteria.
- ii. **Rawatan Profilaksis Ubat Pencair Darah bagi *Venous Thromboembolism*;**  
Pesakit di dalam kategori tahap 4 dan 5 berisiko mengalami keadaan darah beku di dalam saluran darah (*Venous Thromboembolism*) yang boleh menyebabkan kematian. Oleh yang demikian, pesakit-pesakit ini diberikan ubat pencair darah seperti *Low Molecular Weight Heparin Enoxaparin* bagi mengelakkan terjadinya komplikasi tersebut.
- iii. **Sokongan Hemodinamik;**  
Bertujuan mengekalkan sistem peredaran darah dan mengelak dari terjadinya renjatan akut (*shock*) yang boleh mengancam nyawa. Rawatan cecair atau infusi intravena akan diberikan manakala ubat-ubat *inotrope* diberikan kepada pesakit sekiranya perlu.



- iv. Selain daripada rawatan yang telah dinyatakan, pemberian ubatan profilaksis bagi mengelak *stress ulcer* serta mobilisasi pesakit turut diberikan.

**Tuan Yang di-Pertua,**

5. Protokol ini sentiasa dikemaskini berdasarkan perkembangan terkini dan bukti saintifik dari masa ke semasa. Kementerian Kesihatan Malaysia sentiasa komited dalam memberikan rawatan yang terbaik kepada pesakit COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : YB DATO' HAJI AHMAD NAZLAN BIN IDRIS  
[JERANTUT]**

**TARIKH : 24 NOVEMBER 2020 (SELASA)**

**SOALAN**

**DATO HAJI AHMAD NAZLAN BIN IDRIS [JERANTUT]** minta **MENTERI SUMBER MANUSIA** menyatakan statistik jumlah terkini kadar pengangguran berbanding negara serantau serta langkah yang diambil Kerajaan bagi mengatasi masalah ini.

**JAWAPAN**

**Tuan Yang di-Pertua,**

1. Untuk makluman Ahli-Ahli Dewan Yang Mulia ini, Jabatan Perangkaan Malaysia (DOSM) menganggarkan julat maksimum kadar pengangguran adalah dalam lingkungan 3.5% hingga 5.5% pada tahun ini susulan daripada pandemik Covid-19. Bagi suku tahun pertama 2020, kadar pengangguran di Malaysia adalah 3.5% manakala negara-negara serantau termasuk Indonesia, Thailand, Filipina, Singapura dan Vietnam masing-masing menunjukkan kadar pengangguran dalam julat lingkungan 0.8% sehingga 3.3%.

2. Berdasarkan data terkini Survei Tenaga Buruh DOSM, kadar pengangguran di Malaysia pada bulan September 2020 turun 0.1 mata peratus kepada 4.6% berbanding Ogos 2020. Bilangan penganggur turun 0.6 peratus merekodkan 737.5 ribu orang (Ogos 2020: 741.6 ribu orang)

3. Dalam mendepani situasi pengangguran di Malaysia serta memperkasakan rakyat, Kerajaan telah mengumumkan Pelan Jana Semula Ekonomi Negara (PENJANA) bertujuan membantu mereka yang kehilangan sumber pendapatan untuk mendapatkan pekerjaan, melindungi pekerjaan dan meningkatkan kemahiran. Rakyat akan dapat memanfaatkan peluang semasa ekonomi beransur pulih melalui Inisiatif PENJANA tersebut.

4. Lima (5) inisiatif PENJANA di bawah Kementerian Sumber Manusia adalah Pelaksanaan Program Subsidi Upah, Menaik Taraf Portal Perkhidmatan Pekerjaan Negara, Program Insentif Pengambilan Pekerja dan Bantuan Latihan, Program Kemahiran dan Peningkatan Kemahiran dan Perlindungan Sosial dan Latihan bagi Pekerja Ekonomi Gig.

**Untuk makluman Ahli Yang Berhormat,**

5. Program Subsidi Upah (PSU 1.0) dan pelanjutan Program Subsidi Upah (PSU) 2.0 telah membantu majikan yang terkesan supaya dapat meneruskan operasi syarikat serta mengelakkan pekerja hilang pekerjaan.

Program ini telah melibatkan pengagihan dana Kerajaan berjumlah RM2.4 billion dengan sasaran seramai 1.3 juta pekerja. Melalui PSU 1.0, sejumlah 331,569 syarikat dan 2.72 juta pekerja telah menerima manfaat ini. Sehingga 13 November 2020, PERKESO telah menyalurkan bantuan kepada 54,865 majikan dan 686,712 pekerja melalui program PSU 2.0.

6. Kerajaan telah memperuntukkan sejumlah RM1.5 billion kepada PERKESO untuk Program Insentif Pengambilan Pekerja dan Bantuan Latihan. Program ini merangkumi insentif pengambilan pekerja, peningkatan kemahiran pekerja dan penganggur, bantuan perpindahan, dan kerjasama dengan agensi pekerjaan swasta sehingga tempoh 6 bulan. Program ini telah berjaya membantu sejumlah 78,317 pekerja sehingga 13 November 2020.

7. Kementerian juga melalui Pembangunan Sumber Manusia Berhad (PSMB), telah melancarkan Inisiatif PENJANA HRDF pada 22 Jun 2020. Lima (5) skim telah diperkenalkan yang memberi penekanan terhadap latihan dan peningkatan kemahiran pekerja (*upskilling* dan *reskilling*) iaitu *Place and Train*, *B40 Development*, *SME Development*, *Industry Revolution 4.0* dan Gerak Insan Gemilang (GIG).

8. Dalam usaha kerajaan untuk memperkasakan rakyat, Kementerian melalui Pembangunan Sumber Manusia Berhad (PSMB) telah dipertanggungjawabkan untuk turut menyelaraskan pelaksanaan program PENJANA *Upskilling & Reskilling* dengan jumlah peruntukan sebanyak RM2 billion. Program kemahiran dan peningkatan kemahiran ini sedang dilaksanakan merentasi Lapan (8) Kementerian dan Agensi dan akan memanfaatkan sejumlah 200,000 belia dan golongan penganggur.

9. PENJANA *Upskilling & Reskilling* akan membantu belia dan golongan penganggur dalam mendapatkan pekerjaan baharu (*new jobs*), menghasilkan usahawan baharu (*new entrepreneurs*) atau pengekalannya pekerjaan (*job retention*). Sehingga kini, sejumlah 500 juta peruntukan yang telah disalurkan dan 102,000 pelatih yang telah diluluskan untuk mengikuti pelbagai program dibawah PENJANA *Upskilling & Reskilling* ini. Langkah ini

dijangka akan terus membantu mengurangkan kadar pengangguran Negara ke aras yang lebih stabil.

10. Kementerian juga telah mengambil langkah pro aktif bersama-sama Kementerian Kewangan untuk memantau dan menyelaraskan pelaksanaan inisiatif-inisiatif berkaitan sumber manusia tersebut dengan menubuhkan Jawatankuasa Pekerjaan Nasional (JKPN) pada Jun 2020. Objektif Jawatankuasa ini adalah untuk memantau keadaan pasaran buruh dan pengangguran negara, menyelaraskan pelaksanaan inisiatif PENJANA serta dan memantau keberkesanan inisiatif-inisiatif tersebut.

**Tuan Yang di-Pertua,**

11. Melalui ucapan Belanjawan 2021 oleh Menteri Kewangan baru-baru ini, Kerajaan akan meneruskan inisiatif pengambilan pekerja di bawah PERKESO yang kini dikenali sebagai PenjanaKerjaya dengan sejumlah RM2 bilion ringgit diperuntukkan dan dijangka dapat menyediakan peluang pekerjaan kepada 250 ribu pencari kerja.

12. Kerajaan juga akan memperkenalkan inisiatif MySTEP atau Short-term Employment Programme dengan peruntukan lebih RM700 juta ringgit. Inisiatif ini akan menawarkan 50 ribu peluang pekerjaan secara kontrak dalam sektor awam dan Syarikat Berkaitan Kerajaan atau GLC bermula Januari 2021. Di bawah inisiatif ini, 35 ribu peluang pekerjaan akan ditawarkan di dalam sektor awam dengan keutamaan mengisi perjawatan seperti jururawat, *medical attendant*, pegawai kebajikan masyarakat, serta guru sementara. Manakala syarikat GLC pula akan menyediakan 15 ribu peluang pekerjaan yang mengutamakan bidang teknikal dan kewangan serta turut dipanjangkan kepada graduan untuk menjalani program perantisan.

13. Kerajaan juga akan melanjutkan pelaksanaan Program Subsidi Upah selama tiga bulan lagi dengan lebih bersasar, khususnya bagi sektor pelancongan serta sektor peruncitan dengan kadar RM600 ringgit sebulan bagi pekerja bergaji RM4,000 dan ke bawah. Selain itu, had 200 pekerja

## **NO. SOALAN : 13**

bagi setiap permohonan akan ditingkatkan kepada 500 pekerja. Sebanyak RM1.5 bilion ringgit diperuntukkan dan dijangka akan membantu 70 ribu majikan dan 900 ribu pekerja.

14. Pada masa ini, Kerajaan melalui PERKESO membantu pekerja yang kehilangan pekerjaan melalui pemberian Elaun Mencari Pekerjaan. Elaun ini diberi selama enam bulan di mana bulan pertama layak menuntut 80 peratus gaji dan secara beransur-ansur berkurang kepada 30 peratus gaji. Sehubungan itu, bagi tahun 2021, tempoh Elaun Mencari Kerja akan dilanjutkan selama tiga bulan dan kadar layak menuntut daripada 80 peratus gaji bagi bulan pertama, 50 peratus bagi bulan kedua hingga keenam dan seterusnya 30 peratus bagi tiga bulan terakhir. Bagi tujuan ini, peruntukan sebanyak RM150 juta ringgit akan disediakan dan dijangka memanfaatkan sehingga 130 ribu orang pencari kerja.

15. Kerajaan sentiasa berusaha agar kadar pengangguran di Malaysia adalah terkawal dan memastikan rakyat mampu mendepani saat-saat sukar yang belum pernah dialami oleh Negara sebelum ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB PUAN NURUL IZZAH BINTI ANWAR  
[ PERMATANG PAUH ]**

**TARIKH : 3 NOVEMBER 2020 (SELASA)**

**SOALAN**

**YB PUAN NURUL IZZAH BINTI ANWAR [ PERMATANG PAUH ]** minta  
**MENTERI ALAM SEKITAR DAN AIR** menyatakan :-

- (a) langkah persiapan menghadapi jerebu memandangkan pembatalan Akta Jerebu Rentas Sempadan; dan
- (b) rasional pembatalan akta ini atas alasan kerumitan penguatkuasaan. Berikan senarai kerumitan pelaksanaan serta tindakan alternatif atau diplomatik yang diambil.

**JAWAPAN**

Tuan Yang di-Pertua,

Untuk makluman Ahli Yang Berhormat,

**Soalan (a):**

1. Antara langkah yang dilaksanakan oleh Kementerian dalam menghadapi situasi jerebu adalah:

- (i) mengadakan Mesyuarat Jawatankuasa Induk Jerebu dan Cuaca Kering Kebangsaan semasa cuaca panas dan kering dengan kekerapan dua kali setahun bagi memantau persediaan semua Kementerian / Jabatan dan Agensi terlibat dalam menangani pembakaran terbuka dan jerebu;
- (ii) mempertingkatkan penguatkuasaan ke atas kes pembakaran terbuka di kawasan tanah gambut, tapak pelupusan sampah dan lain-lain yang sering terbakar dengan mengadakan operasi bersepadu bersama jabatan dan agensi Kerajaan serta Pihak Berkuasa Tempatan;
- (iii) mengaktifkan Pelan Tindakan Pembakaran Terbuka Kebangsaan dan Pelan Tindakan Jerebu Kebangsaan bagi mencegah insiden pembakaran terbuka dan jerebu di dalam negara;
- (iv) bersiap siaga untuk melaksanakan operasi pembenihan awan bagi mengurangkan kesan jerebu rentas sempadan (tertakluk kepada keadaan semasa awan);
- (v) Kementerian juga sedang dalam usaha memperkukuh hubungan diplomatik bersama Kerajaan Indonesia melalui kerjasama berkaitan alam sekitar khususnya melibatkan pencegahan



kebakaran tanah gambut, kaedah dan teknologi terkini yang diguna pakai; dan

- (vi) di peringkat ASEAN, Malaysia akan terus memainkan peranan untuk dan menyeru negara anggota terutamanya Indonesia untuk mematuhi obligasi di bawah *ASEAN Agreement on Transboundary Haze Pollution* bagi mencegah kejadian jerebu merentas sempadan yang berulang dan mengambil perhatian serius ke atas kesepakatan negara anggota bagi merealisasikan *Road Map on ASEAN Cooperation towards Transboundary Haze Pollution Control with Means of Implementation* yang merupakan kerangka ke arah visi *ASEAN Haze Free Region*.

**Soalan (b):**

2. Kementerian telah meneliti kewajaran penggubalan Rang Undang-Undang Pencemaran Alam Sekitar Merentas Sempadan dari pelbagai sudut merangkumi kebolehlaksanaan undang-undang yang akan digubal, hubungan diplomatik dan elemen pencegahan pencemaran alam sekitar. Kerajaan tidak akan meneruskan cadangan penggubalan Rang Undang-Undang Pencemaran Alam Sekitar Merentas Sempadan mengambil kira maklumbalas daripada pakar undang-undang berkenaan kesukaran mendapatkan maklumat yang diperlukan bagi tujuan pendakwaan.

3. Sekiranya RUU Pencemaran Alam Sekitar Merentas Sempadan ini dikuatkuasakan, bukti jelas bahawa punca jerebu merentas sempadan yang berlaku adalah berpunca dari negara jiran perlu disokong oleh data-data yang mencukupi seperti peta lokasi, koordinat, maklumat pemilik tanah dan syarikat yang beroperasi di lokasi kebakaran. Perkara ini melibatkan kerahsiaan, keselamatan dan kedaulatan negara punca jerebu. Selain itu, maklumat syarikat berkaitan Malaysia yang beroperasi di negara luar juga sukar diperoleh memandangkan ekuiti majoriti dipegang oleh rakyat tempatan di negara syarikat beroperasi.

4. RUU Pencemaran Alam Sekitar Merentas Sempadan juga didapati tidak selari dengan prinsip ASEAN, di mana sekiranya terdapat sebarang pertikaian di kalangan negara ahli, perkara tersebut perlu ditangani secara rundingan (*amicably*). Pelaksanaan perkara ini boleh menjejaskan hubungan baik yang telah terjalin antara Malaysia dan Indonesia. Semua isu yang dihadapi sewajarnya ditangani secara rundingan bersama serta melalui platform di bawah AATHP (*ASEAN Agreement on Transboundary Haze Pollution*).
5. Pelbagai pendekatan boleh diambil kira untuk dilaksanakan bagi menangani pencemaran alam sekitar terutamanya isu jerebu merentas sempadan dan isu jerebu merentas sempadan tidak dapat diselesaikan hanya dengan penggubalan undang-undang semata-mata.
6. Pendekatan secara diplomasi dan rundingan adalah jalan yang lebih baik untuk menangani isu jerebu merentas sempadan secara kolektif. Dalam hal ini, Kerajaan akan melaksanakan pendekatan secara holistik melalui hubungan diplomatik yang erat dan kerjasama teknikal bagi memantapkan lagi keupayaan antara negara khususnya dalam bidang penyelidikan, teknologi berkaitan pengurusan tanah gambut serta operasi pemadaman kebakaran. Perkara ini juga adalah selaras dengan Artikel 16 – Kerjasama Teknikal dan Artikel 17 – Kajian Saintifik, Perjanjian ASEAN mengenai Jerebu Merentas Sempadan yang menekankan perkongsian kepakaran teknologi, teknik dan pengetahuan serta menyokong pelaksanaan penyelidikan saintifik dan teknikal berhubung pengurusan kebakaran tanah gambut dan hutan serta kaedah pemadaman kebakaran yang berkesan.
7. Selain itu, Kerajaan juga akan meneliti dan menambahbaik pelan komunikasi insiden jerebu merentas sempadan bagi memastikan penyampaian maklumat yang tepat, berkesan serta mengelakkan pertikaian yang mengeruhkan hubungan diplomatik Malaysia dengan negara jiran.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE EMPAT BELAS**

---

**PERTANYAAN : LISAN**

**DARIPADA : DATO' SYED ABU HUSSIN BIN HAFIZ SYED  
ABDUL FASAL [ BUKIT GANTANG ]**

**TARIKH : 24 NOVEMBER 2020 (SELASA)**

**SOALAN**

Minta **MENTERI PERTANIAN DAN INDUSTRI MAKANAN** menyatakan langkah-langkah yang diambil Kementerian dalam memastikan proses pemutihan nelayan Zon A di seluruh negara dapat disegerakan dan jaminan bahawa nelayan tulen dan tradisional mendapat pembelaan dan hak yang sewajarnya.

**JAWAPAN**

**Tuan Yang di-Pertua,**

1. Sehingga Oktober 2020, sebanyak 42,748 vesel zon A telah dilesenkan oleh Jabatan Perikanan Malaysia (DOF). Bermula tahun 2017, program pemutihan lesen vesel zon A telah dilaksanakan dan sehingga kini jumlah lesen yang telah dibatalkan adalah sebanyak 4,464 vesel. Dalam tempoh yang sama, terdapat 7,819 lesen vesel zon A yang dikenalpasti tidak aktif kerana tidak memperbaharui lesen secara tahunan.
2. Pada masa yang sama, DOF juga telah menerima 6,647 permohonan baharu lesen vesel zon A daripada nelayan yang telah lama terlibat dalam aktiviti perikanan tetapi tidak mempunyai lesen yang sah. Oleh yang demikian, proses pemutihan yang dilaksanakan

## SOALAN NO : 15

akan membolehkan permohonan baharu ini diberi pertimbangan yang sewajarnya.

3. Bagi memastikan proses pemutihan adalah adil dan telus, DOF telah menetapkan syarat pembatalan lesen seperti berikut:

- i. vesel yang tidak aktif kerana tidak memperbaharui lesen tiga tahun berturut-turut; dan
- ii. pemilik tidak lagi menceburi aktiviti penangkapan ikan berdasarkan siasatan di lapangan dan maklum balas daripada pemilik.

4. Bagi memastikan jaminan dan pembelaan hak yang sewajarnya kepada nelayan tulen dan tradisional sedia ada, DOF akan melaksanakan proses siasatan di lapangan serta mengemukakan surat tunjuk sebab kepada pemilik vesel terlebih dahulu sebelum tindakan pembatalan lesen vesel dilaksanakan.

5. Proses pemutihan ini akan terus dilaksanakan dari semasa ke semasa bagi memastikan bilangan lesen vesel penangkapan ikan zon A yang dikeluarkan adalah terkawal mengikut keupayaan daya tampungan sesebuah kawasan berbanding dengan sumber perikanan sedia ada.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN SANISVARA NETHAJI RAYER A/L  
RAJAJI [JELUTONG]**

**TARIKH : 24 NOVEMBER 2020 (SELASA)**

**SOALAN**

Minta **MENTERI PENGANGKUTAN** menyatakan apakah tindakan dan rancangan yang bakal dilaksanakan oleh Kementerian Pengangkutan untuk memulihkan perkhidmatan feri di Pulau Pinang.

**JAWAPAN**

**Yang Dipertua,**

1. Untuk makluman Yang Berhormat, Kerajaan Persekutuan melalui Kementerian Pengangkutan sentiasa prihatin terhadap isu-isu berhubung operasi perkhidmatan feri Pulau Pinang yang merupakan mod pengangkutan penting dan ikon di Pulau Pinang.
2. Bagi memastikan operasi perkhidmatan feri dapat diteruskan tanpa sebarang halangan demi kesejahteraan rakyat, pihak Kementerian Pengangkutan telah pun melaksanakan tindakan-tindakan yang perlu termasuk mengadakan beberapa siri perbincangan dengan pihak-pihak yang berkaitan termasuk Kerajaan Negeri Pulau Pinang dalam merangka pelan jangka pendek dan panjang bertujuan untuk menambah baik mutu perkhidmatan feri sedia ada.
3. Dalam hal ini, selaras dengan keputusan Jemaah Menteri dalam mesyuaratnya bertarikh 18 Disember 2019, PPSB akan mengambil alih semula operasi perkhidmatan feri Pulau Pinang yang dijangka bermula 1 Januari 2021. PPSB akan mengemukakan model perniagaan perkhidmatan feri yang baharu dan memulakan proses perolehan feri baharu jenis catamaran bagi menggantikan feri-feri sedia ada yang telah usang untuk memastikan kelangsungan operasi perkhidmatan feri Pulau Pinang.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN RAMLI BIN DATO' MOHD NOR  
[ CAMERON HIGHLANDS ]**

**TARIKH : 24 NOVEMBER 2020 (SELASA)**

**SOALAN**

**TUAN RAMLI BIN DATO' MOHD NOR [ CAMERON HIGHLANDS ]** minta **MENTERI KESIHATAN** menyatakan apakah langkah-langkah yang telah Kementerian lakukan terhadap tahap imunisasi serta pemakanan bagi komuniti masyarakat Orang Asli di Malaysia untuk mencegah wabak penyakit seperti COVID-19 daripada menular di kalangan mereka.

**JAWAPAN**

**Tuan Yang di-Pertua,**

1. Tahap imunisasi dalam sesuatu komuniti **perlu mencapai sekurang-kurangnya 95% liputan untuk mencapai imuniti kelompok yang dapat melindungi sesuatu komuniti daripada penularan penyakit cegahan vaksin (*herd immunity*)**. Pada tahun 2019, pencapaian imunisasi kanak-kanak Orang Asli untuk vaksinasi DTap, HiB dan Polio sehingga dos ke-3 melebihi 98%, Hepatitis B sehingga dos ke-3 adalah 91.8% dan Mumps, Measles, Rubella (MMR) dos pertama adalah 99.5% dan dos ke-2 adalah 95%.
2. KKM juga telah melaksanakan beberapa langkah untuk meningkatkan pencapaian imunisasi seperti :

- a) **Mengemaskini dan mengukuhkan pangkalan data dan profail kesihatan masyarakat Orang Asli** untuk menjalani aktiviti *tracing* kes-kes tercicir bagi memastikan liputan imunisasi tercapai;
- b) **Penyampaian perkhidmatan kesihatan melalui fasiliti Klinik Statik dan Klinik Bergerak.** Terdapat sebanyak 9 buah Klinik Kesihatan dan 12 buah Klinik Desa yang terletak di dalam perkampungan Orang Asli di Semenanjung Malaysia;
- c) **KKM juga telah menubuhkan 12 Pasukan Bergerak Orang Asli (PBOA)** khusus bagi penyampaian perkhidmatan kesihatan ke populasi Orang Asli di kawasan pedalaman Pahang, Kelantan, Perak dan Johor iaitu selepas pengambilalihan penyampaian perkhidmatan kesihatan daripada pihak Jabatan Kemajuan Orang Asli (JAKOA) pada tahun 2012.
- d) **Perkhidmatan Pasukan Doktor Udara (PDU) telah dibentuk bagi menyampaikan perkhidmatan kesihatan ke perkampungan Orang Asli pedalaman yang sukar dicapai** melalui jalan darat atau air di negeri Perak dan Kelantan. Perkhidmatan Pasukan Bergerak Orang Asli (PBOA) pula memberikan perkhidmatan kesihatan Pesakit Luar termasuk melakukan Saringan Kesihatan dan Penjagaan Kesihatan Ibu dan Anak di Perkampungan Orang Asli di kawasan pedalaman dan pinggiran sekurang-kurangnya setiap empat (4) minggu sekali.

Tuan Yang di-Pertua,

3. KKM juga menjalankan program pemakanan yang dikenali **Program Community Feeding (PCF) di kawasan prioriti Orang Asli (OA) terpilih di negeri Kelantan, Pahang dan Perak.** Program ini mensasarkan aktiviti pencegahan kanak-kanak Orang Asli yang berisiko dan mengalami masalah kurang berat badan dengan pemberian makanan tambahan, multi-vitamin, minyak ikan dan susu 5 kali seminggu. Bagi kanak-kanak yang mengalami kekurangan berat badan, mereka



akan diberi bantuan bakul makanan dan makanan terapeutik (*Ready-To-Eat Therapeutic Food, RUTF*).

4. Berdasarkan pembentangan Belanjawan Negara bagi tahun 2021, Kerajaan telah memperuntukkan sejumlah RM420 juta untuk menambah baik Program Rancangan Makanan Tambahan (RMT) di sekolah dengan penyediaan bekalan susu setiap hari persekolahan. Kementerian Kesihatan amat menyokong inisiatif ini dan dianggarkan seramai **3,971 orang anak-anak Orang Asli daripada 98 buah sekolah** di seluruh Malaysia akan mendapat manfaat daripada program ini.

5. **Strategi KKM dalam meningkatkan status pemakanan komuniti Orang Asli** dan **pencegahan penyakit** turut diterapkan melalui pemerkasaan komuniti Orang Asli melalui lantikan sukarelawan sebagai ***Agent of Change*** untuk melaksanakan *Program Community Feeding* dan memberi pendidikan kesihatan serta tunjuk ajar mengenai penjagaan kebersihan diri dan kawasan sekitar, pemakanan keluarga serta kepentingan hadir ke klinik kesihatan untuk rawatan.

6. Bagi mengurangkan risiko jangkitan COVID-19 kepada penduduk komuniti rentan (*vulnerable community*) terutamanya di kawasan pedalaman seperti komuniti Orang Asli pula, **KKM menasihatkan sebarang organisasi atau kumpulan yang ingin menjalankan aktiviti bersama komuniti ini untuk menanggungkan berjumpa dengan penduduk komuniti ini.**

7. Kementerian Kesihatan akan terus memberikan perkhidmatan kesihatan dan perubatan kepada penduduk kawasan pedalaman, termasuk kepada komuniti Orang Asli melalui aktiviti *outreach*. Ia bagi **memastikan kelestarian dan kesinambungan perkhidmatan oleh Kementerian Kesihatan** serta kesejahteraan komuniti Orang Asli dan rakyat Malaysia terus dipelihara termasuk dari COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK SERI DR. MUJAHID BIN YUSOF RAWA  
(PARIT BUNTAR)**

**TARIKH : 24 NOVEMBER 2020 (SELASA)**

**SOALAN**

Minta **MENTERI PERTANIAN DAN INDUSTRI MAKANAN** menyatakan mekanisme terbaik bagi membela nasib salah satu rangkaian nilai industri padi iaitu kilang pemprosesan padi yang terhimpit dengan harga siling Beras yang ditetapkan sedangkan kos dan harga padi semakin meningkat saban tahun.

**JAWAPAN**

Tuan Yang Dipertua,

1. Untuk makluman Ahli Yang Berhormat, Kementerian sentiasa prihatin terhadap semua pihak berkepentingan di sepanjang rantai industri padi dan beras yang terdiri daripada pesawah, pembeli padi, pengilang, pemborong, peruncit dan pengguna. Bagi membantu pesawah mempertingkatkan pendapatan, harga lantai belian padi telah diseragamkan daripada RM850 setiap tan metrik kepada RM1,200. Bagi tujuan memastikan rakyat dan pengguna sentiasa memperoleh bekalan beras dengan harga yang berpatutan dan terkawal pula, Kerajaan telah menetapkan harga beras putih tempatan dengan kandungan hancur 5% dikawal tidak melebihi RM2.60 setiap kilogram.

2. Kerajaan sedia maklum berhubung penetapan dasar-dasar tersebut memberikan kesan kepada kepada pihak lain di dalam rantai industri seperti pengilang padi memandangkan margin keuntungan perniagaan yang semakin mengecil kesan daripada harga runcit beras yang ditetapkan. Justeru, Kementerian dalam proses melaksanakan kajian pasaran secara terperinci sebelum mengemukakan cadangan berkaitan dengan perkara ini dengan memastikan pendekatan yang akan dikenal pasti tidak membebankan pengguna dan rakyat keseluruhannya.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN CHE ALIAS BIN HAMID [ KEMAMAN ]**

**TARIKH : 24 NOVEMBER 2020 (SELASA)**

**SOALAN**

**TUAN CHE ALIAS BIN HAMID [KEMAMAN]** minta **MENTERI ALAM SEKITAR DAN AIR** menyatakan perancangan jangka panjang Kementerian dalam memelihara serta memulihara kawasan hutan sebagai suatu cara semula jadi bagi mengatasi masalah banjir yang sering kali berlaku ini.

**JAWAPAN**

**Tuan Yang di-Pertua,**

1. Memelihara serta memulihara kawasan hutan adalah tanggungjawab bersama Kerajaan Negeri dan pelbagai agensi Kerajaan Pusat seperti Kementerian Tenaga dan Sumber Asli (KeTSA) dan Jabatan Perhutanan Semenanjung Malaysia (JPMS).
2. Kerajaan Pusat telah mengambil langkah-langkah proaktif untuk membantu kerajaan-kerajaan negeri dalam merehabilitasi kawasan Hutan Tadahan Air sebagai salah satu langkah bagi mengatasi masalah banjir. Sehingga 31 Disember 2019, seluas 809,823 hektar kawasan di dalam Hutan Simpanan Kekal (HSK) telah diwartakan sebagai Hutan Tadahan Air di Semenanjung Malaysia.

## NO. SOALAN: 19

3. Antara perancangan jangka panjang dan berterusan yang dilaksanakan oleh Kerajaan dalam usaha memelihara khazanah hutan negara adalah seperti berikut:

- (i) mempergiatkan usaha ke arahewartakan kawasan-kawasan berhutan sebagai HSK;
- (ii) meneruskan aktiviti rawatan hutan dan silvikultur dalam HSK;
- (iii) mempertingkatkan usaha pemeliharaan dan pemulihan kawasan hutan melalui Program Restorasi, Tebus Guna dan Pemulihan Kawasan Terosot Di Semenanjung Malaysia;
- (iv) menyediakan Rancangan Pengurusan Hutan Negeri setiap 10 tahun bagi tujuan pentadbiran, pengurusan dan pembangunan HSK secara berkekalan;
- (v) melaksanakan dan meningkatkan aktiviti penguatkuasaan hutan secara bersepadu dengan agensi kerajaan yang berkaitan bagi menangani aktiviti pencerobohan dan kesalahan hutan;
- (vi) menyedia, melaksana dan memantau Catuan Tebangan Tahunan (CTT) setiap tempoh Rancangan Malaysia bagi kawasan hutan pengeluaran dalam HSK;
- (vii) mempertingkatkan aktiviti penyelidikan dan pembangunan (R&D) perhutanan termasuk kaedah pengusahaan yang berimpak rendah; dan
- (viii) memperkasakan amalan pengurusan hutan berkekalan dengan membangun dan mengaplikasikan teknologi terkini yang bersesuaian dengan perhutanan.

4. Di samping itu, antara perancangan jangka panjang dan berterusan untuk mengatasi masalah banjir, KASA telah melaksanakan pendekatan melalui kaedah bukan struktur yang berprinsipkan perancangan,

## NO. SOALAN: 19

khususnya menyediakan pelan-pelan atau sistem yang mengurangkan keterdedahan atau risiko kepada banjir.

5. KASA melalui Jabatan Pengairan dan Saliran (JPS) telah melaksanakan pendekatan Pengurusan Lembangan Sungai Bersepadu (*Integrated River Basin Management* - IRBM). Ia merupakan kaedah terbaik yang memerlukan penglibatan semua pihak berkepentingan bagi mengurangkan risiko banjir dan meningkatkan pemuliharaan alam sekitar. Melalui pelan IRBM ini, Kementerian telah menyediakan perancangan dan pembangunan lembangan untuk rujukan Kerajaan Negeri dalam sesuatu pembangunan agar tidak mengancam kelestarian alam sekitar.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB PUAN ALICE LAU KIONG YIENG (LANANG)**

**TARIKH : 24 NOVEMBER 2020 (SELASA)**

**SOALAN**

**PUAN ALICE LAU KIONG YIENG [ LANANG ]** minta **MENTERI DALAM NEGERI** menyatakan permohonan dari Sarawak yang telah diterima, diproses dan diluluskan sejak penambahbaikan SOP Permohonan Kewarganegaraan di bawah Perkara 15A Perlembagaan Persekutuan mulai tahun 2020 dan apakah rancangan Kementerian untuk membantu golongan pemohon yang gagal sebelum ini tetapi sudah melebihi umur 21 tahun yang lahir di Malaysia dan tidak mengetahui ibu bapa kandung mereka.

**JAWAPAN**

Tuan Yang Di-Pertua,

Berdasarkan rekod Jabatan Pendaftaran Negara (JPN) dari bulan Januari hingga 15 Oktober 2020, sebanyak 70 permohonan kewarganegaraan di bawah Perkara 15A Perlembagaan Persekutuan yang didaftarkan di negeri Sarawak telah diterima. Daripada jumlah permohonan berkenaan, sebanyak 67 permohonan sedang diproses dan tiga (3) permohonan dibatalkan kerana tidak memenuhi syarat.

Bahagian III Perlembagaan Persekutuan telah menetapkan tiga (3) kaedah pemerolehan kewarganegaraan Malaysia iaitu secara kuat kuasa undang-undang, pendaftaran atau penaturalisasian. Bagi individu yang berumur melebihi 21 tahun, permohonan kewarganegaraannya boleh dikemukakan di bawah Perkara 19 Perlembagaan Persekutuan dan individu berkenaan mestilah berstatus Pemastautin Tetap serta bermastautin secara tetap di Malaysia sekurang-kurangnya 12 tahun.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KE TIGA,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : TUAN NIK MOHAMAD ABDUH BIN NIK ABDUL  
AZIZ [ BACHOK ]**

**TARIKH : 24 NOVEMBER 2020 (SELASA)**

**SOALAN**

**TUAN NIK MOHAMAD ABDUH BIN NIK ABDUL AZIZ [ BACHOK ]** minta **MENTERI DALAM NEGERI** menyatakan sama ada wujudnya modus operandi baharu dalam trend pengedaran dan penagihan dadah ketika perlaksanaan PKP di negara ini.

**JAWAPAN**

Tuan Yang Di-Pertua,

Kementerian Dalam Negeri (KDN) khususnya Polis Diraja Malaysia (PDRM) semestinya menyedari tentang kewujudan modus operandi baharu dalam trend pengedaran dadah sepanjang pelaksanaan Perintah Kawalan Pergerakan (PKP) oleh Kerajaan mulai dari 18 Mac 2020 hingga 12 Mei 2020 yang lalu.

Rentetan pelaksanaan PKP yang ketat dan hasil risikan serta beberapa siri operasi yang dilaksanakan dalam tempoh PKP berkenaan, didapati penjual dan pembeli dadah telah menyalahguna perkhidmatan Perniagaan Pengantaraan (*e-hailing*) dan Penghantaran Makanan Mudah Alih antaranya GrabFood, FoodPanda, Lalamove serta BungkusIT untuk melakukan transaksi penghantaran dadah disebabkan kekangan PKP yang tidak membenarkan transaksi secara bersemuka berlaku. Selain daripada itu, risikan juga mendapati pengedaran dadah telah dijalankan melalui platform e-dagang seperti Lazada dan Carousell dalam tempoh PKP berkenaan.

Statistik menunjukkan sebanyak **22,329 kertas siasatan** melibatkan pengedaran serta penagihan dadah telah dibuka yang melibatkan **28,073 tangkapan** sepanjang tempoh PKP dilaksanakan.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK SERI HAJI AHMAD BIN HAJI MASLAN  
[ PONTIAN ]**

**TARIKH : 24 NOVEMBER 2020 (SELASA)**

**SOALAN**

**DATUK SERI HAJI AHMAD BIN HAJI MASLAN [ PONTIAN ]** minta **MENTERI KESIHATAN** menyatakan program komuniti yang sudah dilaksanakan dan dirancang oleh NGO dan agensi Kerajaan bagi memerangi COVID-19 serta senaraikan bukti kesiapsiagaan Kementerian menangani pandemik ini.

**JAWAPAN**

**Tuan Yang di-Pertua,**

1. **Pertubuhan Kesihatan Sedunia (WHO) telah menggariskan enam (6) kriteria** dalam menghentikan penularan pandemik COVID 19 ini dengan salah satunya ialah **mendidik dan memperkasa komuniti untuk mengamalkan dan membudayakan normal-normal baharu.** Justeru itu, Kementerian Kesihatan Malaysia (KKM) telah memperkenalkan **pendekatan CAPP (Cegah & Didik, Amal, Patuh dan Pantau)** dalam **Kempen Pembudayaan Norma Baharu Dalam Komuniti.**
2. KKM telah merancang dan melaksanakan program dengan penglibatan pelbagai lapisan masyarakat. **Dua (2) program utama** yang bertindak sebagai wadah pelaksanaan usaha pemerkasaan komuniti ini adalah **Komuniti Sihat Perkasa Negara (KOSPEN)** dan **Program Skuad Komunikasi Untuk Perubahan Tingkah Laku (Communication for Behavioural Impact - COMBI).**

3. Terdapat 1,085 lokaliti di seluruh negara yang menjalankan program KOSPEN melibatkan 5,000 sukarelawan dan 3,031 lokaliti di seluruh negara yang menjalankan program COMBI melibatkan 26,605 sukarelawan. Sukarelawan-sukarelawan ini telah menjadi agen kesihatan dalam kalangan komuniti bagi menyampaikan mesej dan mendidik komuniti untuk mengamalkan normal baharu dalam urusan seharian. Sehingga 30 Oktober 2020, KKM telah melaksanakan 12,018 sesi libat urus dengan kehadiran 131,478 komuniti yang dilaksanakan bersama komuniti dan NGO.

4. Aktiviti di lapangan ini turut disokong oleh penyampaian mesej melalui media konvensional dan media sosial. Sebanyak 2,192 slot televisyen dan radio telah digunakan untuk menyampaikan mesej-mesej normal baharu, manakala media sosial KKM seperti facebook, twitter, telegram, instagram, youtube dan laman sesawang pula mencatatkan 258,264,335 followers dan viewers.

5. Bagi penduduk luar bandar, penyampaian mesej pula menggunakan Pasukan Bergerak secara kolaborasi dengan Jabatan Penerangan dan sehingga kini, sebanyak 3,529 sesi hebahan dan pengedaran sebanyak 94,982 bahan bercetak kepada komuniti telah dilaksanakan.

**Tuan Yang di-Pertua,**

6. Bagi meningkatkan lagi aktiviti pemeraksanaan di peringkat komuniti, beberapa program dan aktiviti telah dirancang menerusi Agenda Nasional Malaysia Sihat (ANMS) antaranya;

- i) memperkukuhkan kempen norma baharu di peringkat negeri, daerah, institusi dan hospital;
- ii) membina upaya agen kesihatan yang terdiri daripada ketua komuniti, majlis perwakilan penduduk berkaitan Cegah dan Didik, Amal, Patuh dan Pantau (CAPP) di bawah *Program District Risk Reduction Programme (DRRP)*; dan

- iii) memperkasa NGO dan rakan strategik komuniti sebagai agen pelaksana dalam menggerakkan komuniti.

Tuan Yang di-Pertua,

7. Kesiapsiagaan KKM adalah penting dalam menangani wabak dan pandemik penyakit berjangkit, antaranya adalah:
- i. sistem surveilan yang mampan dan mampu mengesan sebarang kejadian luar jangka atau luar biasa;
  - ii. pasukan tindak cepat yang terlatih untuk melakukan siasatan dan penilaian ke atas sesuatu kejadian;
  - iii. sistem sokongan yang kukuh seperti makmal bagi menjalankan ujian ke atas sampel, logistik yang tersusun dan sistematik dan lain-lain;
  - iv. pakar-pakar yang terlatih dalam merawat dan mengendalikan kes-kes dengan penyakit berjangkit;
  - v. hospital yang dilengkapi dengan keperluan pengasingan dan perawatan pesakit dengan penyakit berjangkit, termasuk wad isolasi, wad unit rawatan rapi (ICU), kelengkapan alat bantuan pernafasan dan sebagainya;
  - vi. stockpile ubat-ubatan dan alat perlindungan diri (PPE); dan
  - vii. penyelarasan dan kerjasama padu antara agensi dalam menjalankan aktiviti kawalan dan pencegahan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS TAHUN 2020**

**PERTANYAAN : LISAN**

**DARIPADA : YB TUAN CHARLES ANTHONY SANTIAGO  
[KLANG]**

**TARIKH : 24 NOVEMBER 2020 (SELASA)**

**SOALAN**

**TUAN CHARLES ANTHONY SANTIAGO [KLANG]** minta **MENTERI SUMBER MANUSIA** menyatakan inisiatif Kerajaan untuk membantu pekerja-pekerja di sektor informasi dan ekonomi gig. Adakah pihak Kementerian akan mempertimbangkan penggunaan aplikasi pintar untuk mendaftarkan pekerja informal yang kehilangan pekerjaan akibat wabak COVID-19. Apakah program keselamatan sosial untuk pekerja informal selain daripada bantuan kewangan secara '*one-off*'.

**JAWAPAN**

**Tuan Yang di-Pertua,**

1. Untuk makluman Ahli-Ahli Dewan Yang Mulia ini, antara inisiatif Kerajaan untuk membantu pekerja-pekerja dalam sektor informasi dan ekonomi gig adalah dengan melancarkan Program PenjanaGig melalui Program Jana Semula Ekonomi Negara (PENJANA) pada 5 Jun 2020.
2. Melalui program ini, Orang Bekerja Sendiri (OBS) akan mendapat perlindungan di bawah Skim Keselamatan Sosial Pekerjaan Sendiri (SKSPS). Di bawah PenjanaGig, Kerajaan membiayai sebanyak 100% bayaran caruman melalui platform penyedia perkhidmatan ekonomi gig di bawah caruman pelan kedua iaitu sebanyak RM232.80 untuk tempoh perlindungan setahun.
3. Pihak Kementerian Sumber Manusia menerusi PERKESO bersedia mempertimbangkan sebarang cadangan termasuk penggunaan aplikasi pintar untuk mendaftarkan pekerja informal yang kehilangan pekerjaan akibat wabak COVID-19. Walau bagaimanapun, kajian perlu dilakukan secara menyeluruh dari segi kebolehgunaan aplikasi tersebut supaya ianya dapat memberi manfaat kepada pekerja informal.
4. Antara program keselamatan sosial untuk pekerja informal selain daripada bantuan kewangan secara '*one-off*', termasuklah usaha daripada Kerajaan-Kerajaan Negeri yang mengambil inisiatif untuk menaja bayaran caruman kepada OBS.

**Tuan Yang di-Pertua,**

5. Pada 30 Mac 2020, Kerajaan Negeri Terengganu telah memperuntukkan sebanyak RM129,669.60 untuk menaja seramai 557 orang pemandu teksi / kereta sewa / bas di bawah caruman Pelan Kedua iaitu sebanyak RM232.80 seorang untuk tempoh perlindungan selama setahun.

## **SOALAN NO : 23**

6. Manakala Kerajaan Negeri Melaka pula telah menaja seramai 1,028 orang pemandu teksi dengan jumlah perbelanjaan sebanyak RM161,601.60 pada tahun 2019. Pada 2 Oktober 2020, Kerajaan Negeri Melaka telah membelanjakan sebanyak RM105,009.60 untuk menaja seramai 668 orang pemandu teksi dan beca.
7. Lembaga Ikan Malaysia (LKIM) turut mengambil inisiatif dengan membayar caruman sebanyak RM6.6 juta kepada kira-kira 42,000 orang nelayan melalui potongan Elaun Sara Hidup (ESH) secara berperingkat dengan tempoh perlindungan Skim Keselamatan Sosial Pekerjaan Sendiri (SKSPS) mulai 15 Ogos 2020.
8. Kementerian Sumber Manusia menerusi PERKESO akan terus melipatgandakan usaha dalam menyebarkan dan mempromosikan penyertaan pekerja-pekerja sektor informal untuk menyertai Skim Keselamatan Sosial Pekerjaan Sendiri (SKSPS) ini.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE EMPAT BELAS**

---

**PERTANYAAN : LISAN**

**DARIPADA : DATUK ROBERT LAWSON CHUAT [ BETONG ]**

**TARIKH : 24 NOVEMBER 2020 (SELASA)**

**SOALAN**

Minta **MENTERI PERTANIAN DAN INDUSTRI MAKANAN** menyatakan adakah Kementerian akan meneruskan Program Taman Kekal Pengeluaran Makanan (TKPM) di Sarawak sebagai landasan untuk mentransformasikan sektor pertanian ke arah pertanian moden atau “*Smart Farming*”.

**JAWAPAN**

**Tuan Yang di-Pertua,**

1. Program Taman Kekal Pengeluaran Makanan (TKPM) merupakan satu komitmen Kementerian untuk terus memacu sektor pertanian sebagai sumber pendapatan rakyat selain memperkasakan jaminan bekalan makanan negara.
2. Bagi negeri Sarawak, sebanyak lima (5) TKPM telah dibangunkan oleh Kementerian dalam tempoh RMKe-11 dengan keluasan 150 hektar iaitu:
  - i. TKPM Semenggok, Kuching seluas 54 hektar;
  - ii. TKPM Pejiru, Kuching seluas 20 hektar;
  - iii. TKPM Rampangi, Kuching seluas 8 hektar;

- iv. TKPM Penipah, Mukah seluas 40 hektar; dan
- v. TKPM Kabuloh, Miri seluas 28 hektar.

Hasil pengeluaran TKPM di Negeri Sarawak dari tahun 2014 sehingga 2020 adalah sebanyak RM25.75 juta.

3. Kementerian telah merancang untuk terus membangunkan TKPM di Sarawak dalam RMKe-12 dan antara kawasan yang telah dicadangkan untuk dibangunkan adalah seperti:

- i. TKPM Kubong di Limbang;
- ii. TKPM Layar di Betong;
- iii. TKPM Julau di Sarikei; dan
- iv. TKPM Bintulu.

4. Kementerian komited untuk mentransformasikan sektor pertanian dengan penumpuan kepada penyediaan infrastruktur asas, pengamalan teknologi moden dalam pertanian seperti fertigasi, sistem pasca tuai dan jaringan logistik supaya ia mampu menyediakan sektor pertanian kearah pertanian pintar dan meningkatkan produktiviti sektor pertanian.

5. Kementerian yakin dengan penyediaan kawasan pertanian yang lengkap dengan infrastruktur asas seperti TKPM, kebolehcapaian kepada sistem pertanian berteknologi tinggi dan pertanian pintar dalam kalangan pengusaha dapat ditingkatkan dan hasrat Kerajaan untuk merealisasikan pertanian pintar dengan penggunaan teknologi tinggi secara komersil seperti sistem sensor dan *Internet of Things* (IoT) dapat dicapai.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS (2020)**

---

**PERTANYAAN : LISAN**

**DARIPADA : DATUK MOHD. AZIS BIN JAMMAN  
[SEPANGGAR ]**

**TARIKH : 24 NOVEMBER 2020 (SELASA)**

**SOALAN**

**DATUK MOHD. AZIS BIN JAMMAN [SEPANGGAR ]** minta **MENTERI ALAM SEKITAR DAN AIR** menyatakan adakah Kementerian akan menyegerakan projek Rancangan Tebatan Banjir (RTB), dan projek sistem agihan saluran air tahun ini khususnya di daerah-daerah kritikal di Sabah yang kerap dilanda banjir.

**JAWAPAN**

**Tuan Yang Di-Pertua,**

1. Kerajaan telah meluluskan peruntukan sebanyak RM746 juta bagi pelaksanaan projek-projek Rancangan Tebatan Banjir (RTB) di Negeri Sabah untuk dilaksanakan oleh Kementerian Alam Sekitar dan Air (KASA) melalui Jabatan Pengairan dan Saliran (JPS).
2. Sebanyak 8 projek di dalam peringkat pelaksanaan di tapak manakala 7 projek di dalam peringkat awalan projek. Di samping itu Kerajaan juga telah meluluskan peruntukan untuk Rancangan Tebatan Banjir Pelbagai Negeri Sabah dengan peruntukan sebanyak RM 56.6 juta. Kementerian sentiasa komited untuk melaksanakan kerja-kerja yang telah diluluskan bagi mengatasi isu banjir yang melanda di negeri Sabah.

Sekian. Terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS TAHUN 2020**

**PERTANYAAN : LISAN**

**DARIPADA : YB DATO' SRI BUNG MOKTAR BIN RADIN  
[KINABATANGAN]**

**TARIKH : 24 NOVEMBER 2020 (SELASA)**

**SOALAN**

**YB DATO' SRI BUNG MOKTAR BIN RADIN [KINABATANGAN]** minta **MENTERI SUMBER MANUSIA** menyatakan perancangan Kementerian dalam membantu graduan menganggur untuk mendapatkan pekerjaan dan apakah usaha bagi mengawal atau mengurangkan bilangan pekerja yang diberhentikan ekoran pandemik COVID-19.

**JAWAPAN**

**Tuan Yang di-Pertua,**

1. Untuk makluman Ahli-Ahli Dewan Yang Mulia ini, Kerajaan sedang berusaha agar pelbagai peluang pekerjaan dapat diwujudkan dan ditawarkan kepada graduan baharu serta pekerja-pekerja yang diberhentikan akibat kemelesetan ekonomi tahun ini. Inisiatif yang sedang dan akan dilaksanakan oleh Kerajaan adalah:

- a. menambahbaik **ekosistem tenaga bakat muda negara dan pembangunan kebolehpasaran graduan** melalui pelaksanaan program oleh TalentCorp dengan pencapaian bagi tahun 2020 sehingga 6 November 2020 seperti berikut :
  - i. seramai **3,037 orang** telah menyertai **Program Latihan Industri Berstruktur (*Structured Internship Programme (SIP)*)**;
  - ii. Seramai **128,000 orang** telah menyertai program ***Nurturing EXpert Talent (NEXT)***;
  - iii. Seramai **6,922 orang** telah menyertai program ***Scholarship Talent Attraction & Retention (STAR)***;
  - iv. Seramai **2,237 orang** telah menyertai program ***Young Employable Students (YES!)***; dan
  - v. 2 sesi **Kolaborasi Industri-Akademia (IAC)** telah diadakan di antara Universiti Sains Islam Malaysia (USIM) (*Medical Industry*) dan UiTM (*General Study*).
- b. melaksanakan latihan-latihan kemahiran yang bersifat *internship* seperti **Sistem Latihan Dual Nasional (SLDN)** untuk meningkatkan peluang pekerjaan berkemahiran tinggi. SLDN adalah sistem pembelajaran di mana 70% – 80% latihan praktikal dilaksanakan di tempat kerja dan 20% - 30% pembelajaran teori di pusat latihan. Sistem latihan sebegini dapat meningkatkan kebolehpasaran graduan dan merupakan

salah satu usaha Kerajaan untuk menyediakan peluang pekerjaan bagi menangani masalah pengangguran.

- c. melaksanakan **Program Insentif Pengambilan Pekerja (*Hiring Incentives Programme*)**, Bantuan Mobiliti dan Program Latihan di bawah Pelan Jana Semula Ekonomi Negara (**PENJANA**). Inisiatif ini adalah bertujuan untuk merangsang pengambilan pekerja oleh majikan. Pencapaian program-program **di bawah PENJANA** bermula dari **5 Jun sehingga 13 November 2020** adalah seperti berikut:
- (i) program ***MyApprentice*** memberi keutamaan diberi kepada graduan baharu dan pelajar lepasan sekolah. Insentif kewangan sebanyak **RM600** bagi pengambilan perantis dari kalangan graduan baharu atau lepasan sekolah dan **RM1000** untuk pengambilan perantis Orang Kurang Upaya dari kalangan graduan baharu. Seramai **5,150** perantis telah berjaya ditempatkan di bawah program ***MyApprentice***;
  - (ii) program ***HireMalaysia*** adalah untuk pengambilan pekerja tempatan yang juga termasuk graduan. Seramai **72,823** pekerja telah berjaya ditempatkan;
  - (iii) **bantuan mobiliti** secara ***one-off*** diberi kepada pekerja yang berpindah dari lokasi tempat bermastautin ke tempat kerja baharu. Seramai **3,983** orang pekerja telah mendapat faedah melalui inisiatif ini.
  - (iv) program **latihan** untuk graduan dan pekerja berdasarkan keperluan majikan. Seramai **9,327** graduan dan pekerja telah mendapat manfaat dari program latihan;
- d. selain itu, Kerajaan juga telah melaksanakan Portal Perkhidmatan Pekerjaan Nasional yang dikenali ***MYFutureJobs***. Sejak ***MYFutureJobs*** diperkenalkan, 106,937 pemohon telah

berjaya ditempatkan dan seramai 55,757 adalah dalam lingkungan umur 20 tahun sehingga 29 tahun ;

- e. bagi memudahkan graduan dan pencari kerja, PERKESO telah melaksanakan program Karnival PenjanaKerjaya. Setakat 30 Oktober 2020, sebanyak 229 program Karnival PenjanaKerjaya telah dilaksanakan melibatkan penyertaan 541 majikan dan berjaya menempatkan 4,060 para graduan dan pencari kerja yang lain; dan
2. Seterusnya, dalam usaha Kerajaan untuk menyediakan pekerja-pekerja berkemahiran yang memenuhi keperluan industri, beberapa langkah sedang diambil oleh Kementerian, antaranya:
- a. Pada tahun 2019, di bawah *Technical Working Groups (TWG-S)*, sebanyak 19 juta telah dibelanjakan oleh Kerajaan untuk melatih tenaga pengajar dan tenaga kerja. Manakala bagi tahun 2020, kebanyakan pelaksanaan program terpaksa ditangguhkan berikutan pelaksanaan Perintah Kawalan Pergerakan (PKP) akibat COVID-19. Kerajaan menjangkakan pelaksanaan pada tahun hadapan akan meningkat dan lebih cemerlang selepas pelaksanaan PKP tamat.
  - b. Kerajaan telah menyediakan insentif latihan secara dalam talian. MDEC dengan kerjasama Coursera telah memperkenalkan satu inisiatif pembelajaran secara dalam talian bagi melatih warganegara Malaysia yang hilang pekerjaan dan tidak bekerja khusus dalam bidang digital. Sehingga September 2020, seramai 21,733 orang telah diluluskan untuk menjalani latihan digital dalam talian.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN CHA KEE CHIN [ RASAH ]**

**TARIKH : 24 NOVEMBER 2020 (SELASA)**

**SOALAN**

**TUAN CHA KEE CHIN [ RASAH ]** minta **MENTERI KESIHATAN** menyatakan apakah perancangan pihak Kementerian untuk mengatasi masalah kekurangan lot parkir di Hospital Tuanku Jaafar Seremban, memandangkan hospital ini menerima ramai pesakit setiap hari, sama ada Kementerian bersedia membina lot parkir bertingkat untuk mengatasi masalah yang berlaku.

**JAWAPAN**

**Tuan Yang di-Pertua,**

1. KKM mempunyai perancangan untuk **melaksanakan secara serah urus (outsourcing) perkhidmatan pengurusan tempat letak kereta di Hospital Tuanku Ja'afar, Seremban** bagi membolehkan tempat letak kereta di hospital diuruskan dengan lebih sistematik, teratur dan efisien. KKM juga ada mengadakan beberapa **strategi jangka pendek** bagi mengatasi masalah kekurangan lot parkir di Hospital Tuanku Ja'afar, Seremban seperti berikut:

- a. **Menaiktaraf kawasan tempat letak kereta di kawasan hospital** dengan peruntukan sebanyak RM200 ribu pada tahun 2019;
- b. **Bekerjasama dengan Kerajaan Negeri bagi membenarkan perkhidmatan bas percuma** yang dikenali sebagai 'Bas Rakyat' untuk melalui kawasan hospital;



- c. **Mengadakan kerjasama dengan syarikat penyedia perkhidmatan e-hailing** contohnya GRAB untuk kemudahan orang awam yang berurusan dengan hospital; dan
- d. ***Mengalakkan penglibatan oleh syarikat swasta seperti perkhidmatan valet parking*** untuk dilaksanakan di Hospital-hospital KKM termasuk Hospital Tuanku Ja'afar, Seremban.

2. Selain itu, antara **strategi jangka panjang** yang sedang diambil oleh KKM adalah **cadangan pembinaan kompleks TLK bertingkat secara Kerjasama Awam Swasta (Public Private Partnership – PPP) melalui kaedah Build-Operate-Transfer (BOT)**, di mana Kerajaan memberikan peluang kepada pihak luar untuk menambah dan mengoperasikan ruang TLK sedia ada di Hospital-hospital. Projek ini bertujuan untuk **meningkatkan kelancaran pengoperasian perkhidmatan Hospital di samping membantu melicinkan lagi aliran trafik di sekitar kawasan hospital**. Projek ini sedang dirintiskan di beberapa buah hospital di kawasan Lembah Klang contohnya seperti di Hospital Tengku Ampuan Rahimah, Klang, Selangor.

3. Sekiranya projek tersebut berjaya, pelaksanaan projek tersebut akan diperluaskan ke fasiliti-fasiliti kesihatan lain yang memerlukan projek seumpama termasuklah Hospital Tuanku Jaafar, **tertakluk kepada kecukupan ruang tanah bagi melaksanakan projek** dan juga **keupayaan orang awam untuk membayar caj TLK yang akan dikenakan oleh pihak swasta tersebut**.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : DR. AZMAN BIN ISMAIL [KUALA KEDAH]**

**TARIKH : 24 NOVEMBER 2020 (SELASA)**

**SOALAN**

**DR. AZMAN BIN ISMAIL [KUALA KEDAH]** minta **MENTERI SUMBER MANUSIA** menyatakan jumlah rakyat Malaysia yang telah hilang pekerjaan sejak bermula pandemik COVID-19. Mohon diberikan jawapan mengikut sektor ekonomi.

**JAWAPAN**

**Tuan Yang di-Pertua,**

1. Untuk makluman Ahli-Ahli Dewan Yang Mulia ini, Kementerian Sumber Manusia melalui PERKESO sentiasa memantau keadaan pemberhentian pekerja di seluruh negara. Kesan dari penularan wabak COVID-19 telah pun dapat dilihat seawal bulan Januari 2020. Berdasarkan rekod Sistem Insurans Pekerjaan (SIP), jumlah rakyat Malaysia yang telah kehilangan pekerjaan dari Januari 2020 sehingga 13 November 2020 melibatkan seramai **95,995** pekerja. Pecahan kes kehilangan pekerjaan mengikut sektor ekonomi adalah seperti berikut:

- a) Perkilangan mencatatkan angka terbesar iaitu seramai **21,782** orang pekerja;
- b) Penginapan dan *F&B* melibatkan **13,478** orang pekerja;
- c) Pemborong dan peruncitan seramai **13,226** orang pekerja;

**SOALAN NO : 28**

- d) Profesional dan teknikal mencatatkan **9,253** orang pekerja;
- e) Pentadbiran dan khidmat sokongan mencatatkan **7,445** orang pekerja;
- f) Pembinaan mencatatkan **6,855** orang pekerja;
- g) *ICT* melibatkan **5,136** orang pekerja;
- h) Pengangkutan melibatkan **5,418** orang pekerja;
- i) Kewangan dan takaful insurans mencatatkan **2,468** orang pekerja;
- j) Hartanah mencatatkan **2,506** orang pekerja;
- k) Pendidikan mencatatkan **1,967** orang pekerja;
- l) Seni, hiburan dan rekreasi mencatatkan **1,199** orang pekerja;
- m) Perlombongan dan penggalian mencatatkan **1,,436** orang pekerja;
- n) Pertanian, perhutanan dan perikanan mencatatkan **775** orang pekerja;
- o) Kesihatan dan kerja sosial mencatatkan **687** orang pekerja;
- p) Bekalan elektrik, gas, wap dan penyaman udara mencatatkan **492** orang pekerja;
- q) Air, pembentungan dan sisa melibatkan **409** orang pekerja;
- r) Keselamatan sosial mencatatkan **101** orang pekerja;
- s) Aktiviti luar wilayah mencatatkan **32** orang pekerja;
- t) Aktiviti isi rumah mencatatkan **10** orang pekerja;
- u) Perkhidmatan lain melibatkan **1,320** orang pekerja;

Sekian terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN CHOW KON YEOW [TANJONG]**

**TARIKH : 24 NOVEMBER 2020 (SELASA)**

**SOALAN**

Minta **MENTERI PENGANGKUTAN** menyatakan adakah Kementerian telah mempunyai plan perancangan keseluruhan berhubung kerja-kerja menaik taraf serta pengoperasian feri-feri baru di Pulau Pinang. Adakah Kerajaan Negeri Pulau Pinang akan turut dijemput untuk memberi maklum balas berhubung plan berkaitan dan bilakah ia dijangka dibentangkan kepada Kerajaan Negeri Pulau Pinang.

**JAWAPAN**

Yang Dipertua,

1. Untuk makluman Yang Berhormat, Kerajaan Persekutuan melalui Kementerian Pengangkutan sentiasa komited dan prihatin terhadap isu-isu berhubung kelangsungan operasi perkhidmatan feri Pulau Pinang.
2. Buat masa ini, operasi perkhidmatan feri Pulau Pinang sedang dikendalikan oleh Rapid Ferry Sdn Bhd, iaitu sebuah anak syarikat di bawah Prasarana Malaysia Berhad. Namun, selaras dengan keputusan Jemaah Menteri dalam mesyuaratnya bertarikh 18 Disember 2019, Penang Port Sdn. Bhd. (PPSB) akan mengambil alih semula operasi perkhidmatan feri Pulau Pinang yang dijangka bermula 1 Januari 2021.
3. Dalam hal ini, PPSB akan mengemukakan model perniagaan perkhidmatan feri baharu jenis catamaran. Selaras dengan model perniagaan tersebut, pihak Kementerian Pengangkutan dengan kerjasama semua pihak berkaitan akan turut membuat perancangan yang sewajarnya berhubung penaiktarafan pelabuhan dan dari segi operasi perkhidmatan feri bagi menyesuaikan feri catamaran ini.
4. Selain itu, Kerajaan Persekutuan juga sentiasa mengalu-alukan pandangan dan maklum balas daripada Kerajaan Negeri Pulau Pinang bagi menambah baik mutu operasi perkhidmatan feri Pulau Pinang. Perkara tersebut telah pun dimulakan dengan penubuhan satu jawatankuasa kerja oleh Lembaga Suruhanjaya Pelabuhan Pulau Pinang (SPPP). Jawatankuasa tersebut dipengerusikan bersama oleh YB Setiausaha Kerajaan Negeri Pulau Pinang dan Pengurus Besar SPPP serta dianggotai oleh Ahli Lembaga SPPP, wakil daripada PPSB dan wakil Rapid Ferry Sdn. Bhd. manakala ahli-ahli lain akan dijemput berdasarkan keperluan isu.
5. Sesi libat urus seterusnya dengan Kerajaan Negeri Pulau Pinang akan diadakan setelah PPSB mengemukakan model perniagaan perkhidmatan feri kepada SPPP untuk pertimbangan dan persetujuan Kerajaan Persekutuan yang dijangka akan diadakan selewat-lewatnya pada pertengahan bulan Disember 2020.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS (2020)**

---

**PERTANYAAN : LISAN**

**DARIPADA : DATO' SERI UTAMA HAJI MUKHRIZ BIN TUN  
DR. MAHATHIR [ JERLUN ]**

**TARIKH : 24 NOVEMBER 2020 (SELASA)**

**SOALAN**

**DATO' SERI UTAMA HAJI MUKHRIZ BIN TUN DR. MAHATHIR [JERLUN]** minta **MENTERI ALAM SEKITAR DAN AIR** menyatakan penyelesaian jangka panjang yang akan dilaksanakan bagi menangani masalah kecetekan muara sungai sekitar negara khususnya di Kedah.

**JAWAPAN**

Tuan Yang Di-Pertua,

1. Kementerian melalui Jabatan Pengairan dan Saliran (JPS) telah meluluskan peruntukan berjumlah RM 1.5 juta pada tahun 2020 untuk melaksanakan kerja-kerja pengorekan muara sungai bagi mengatasi masalah kecetekan muara-muara sungai di negeri Kedah. Kerja-kerja pengorekan muara sungai ini melibatkan beberapa kawasan iaitu di Muara Sg. Kuala Tunjang, Muara Sg. Teluk Yu, Muara Sg. Belanga Pechah, Muara Sg. Kelibang dan Muara Sg. Kerpan.

2. Untuk langkah penyelesaian jangka panjang bagi mengatasi masalah kecetekan muara-muara sungai, satu kajian yang khusus dan lebih terperinci iaitu Kajian Sedimentasi Muara Sungai Seluruh Negara yang akan melibatkan muara-muara di seluruh negara termasuk di negeri Kedah telah dimohon dalam RMKe-12.

## **NO. SOALAN: 30**

3. Secara prinsipnya, penyelesaian jangka masa panjang boleh diatasi jika kita mengurangkan hakisan tanah di hulu menerusi pelbagai aktiviti guna tanah dan buffer zone di sepanjang tebing sungai.
4. Ini boleh dilaksanakan dengan menggunakan manual saliran mesra alam (MASMA) yang disediakan oleh JPS.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB DATO' SRI DR. SHAHIDAN BIN KASSIM  
(ARAU)**

**TARIKH : 24 NOVEMBER 2020 (SELASA)**

**SOALAN**

**DATO' SERI DR. SHAHIDAN BIN KASSIM [ ARAU ]** minta **MENTERI DALAM NEGERI** menyatakan apakah langkah yang diambil oleh kementerian dalam membersihkan semula imej Polis Diraja Malaysia (PDRM) agar kepercayaan rakyat yang telah goyah ekoran penahanan beberapa anggota dan pegawai PDRM yang terlibat dalam Macau Scam dan pengubahan wang haram oleh SPRM kembali pulih serta apakah inisiatif bagi memastikan isu Macau Scam yang berpunca daripada kebocoran data dan maklumat peribadi tidak lagi berlaku.

**JAWAPAN**

**Tuan Yang Di Pertua,**

Untuk makluman, langkah-langkah yang diambil oleh Jabatan Integriti dan Pematuhan Standard, Polis Diraja Malaysia (PDRM) dalam membersihkan semula imej PDRM agar kepercayaan rakyat yang telah goyah ekoran penahanan beberapa anggota dan pegawai PDRM yang terlibat dalam Macau Scam dan pengubahan wang haram oleh SPRM adalah seperti berikut :

1. Memastikan agenda pemantapan governans, integriti dan antirasuah kerajaan dilaksanakan sebagaimana berikut:



**1.1. Pelan Antirasuah Organisasi (OACP) PDRM**

Sejajar dengan arahan pelaksanaan Pelan Antirasuah Nasional (*National Anti-Corruption Plan* (OACP), Pelan Antirasuah Organisasi bagi PDRM telah dibangunkan dengan cara mengenal pasti bidang berisiko serta mengatur strategi dan inisiatif yang bersesuaian bagi mengatasi setiap risiko yang berhubung kait dengan rasuah termasuk isu terkini iaitu penglibatan pegawai PDRM dalam jenayah Macau Scam dan pengubahan wang haram.

**1.2. Jawatankuasa Antirasuah (JAR) PDRM**

Jabatan Integriti dan Pematuhan Standard sebagai sekretariat JAR bagi PDRM sentiasa memastikan semua Pengerusi JAR Jabatan, Kontinjen (Negeri-negeri), Formasi dan Daerah melaksanakan JAR di peringkat masing-masing serta memastikan setiap isu yang berkaitan dengan jenayah rasuah ditangani sebagaimana objektif pelaksanaan yang ditetapkan kerajaan.

**1.3. Memperkasakan JIPS:**

Keupayaan Jabatan Integriti dan pematuhan Standard untuk melaksanakan semua enam fungsi teras telah diberi perhatian khasnya melibatkan fungsi penguatkuasaan undang-undang dan peraturan iaitu pemeriksaan pematuhan, operasi pengesanan dan pengesanan, serta penyiasatan dan perundangan.

2. Semua cawangan dan unit daripada enam teras dalam JIPS terus digembling bagi memastikan fungsi dan peranan JIPS dalam mengembalikan kepercayaan masyarakat kepada PDRM, diantaranya :-

**2.1. Pengurusan Aduan:**

PDRM melalui JIPS membuka luas ruang kepada masyarakat awam mahupun warga PDRM dalam menyalurkan aduan atau maklumat ke atas apa juga salahlaku khasnya berkaitan rasuah dan salahguna kuasa melalui apa juga saluran samada secara hadir sendiri, perhubungan telefon mahupun melalui kemudahan perhubungan secara elektronik / secara maya.

**2.2. Pemeriksaan Pematuhan:**

Pemeriksaan Pematuhan secara pro-aktif melalui pelbagai pendekatan termasuk tindakan 'Mystery Shopping' dan 'Integrity Tetsting'. Penguatkuasaan akauntabiliti penyeliaan sebagaimana peruntukan Peraturan 3(C) Peraturan-Peraturan Pegawai Awam (Kelakuan dan Tatatertib) 1993 (PPPA (K&T) 1993) sejajar dengan arahan Ketua Setiausaha Kementerian dan Ketua polis Negara.

**2.3. Bahagian Agama Dan Kaunseling (BAKA), JIPS:**

Bahagian Agama dan Kaunseling (BAKA) JIPS bertanggungjawab untuk memperkasakan modal insan PDRM melalui pendekatan psikologi dan spiritual dengan memberi penekanan kepada aspek pembangunan, pencegahan, dan pemulihan.

Selain itu, PDRM melalui BAKA juga sentiasa melaksanakan program-program membimbing anggota dan pegawai PDRM menjurus kepada konsep tadbir urus yang bercirikan kepimpinan yang amanah sebagai standard of practice dalam tadbir urus PDRM dan dibudayakan oleh semua peringkat pembuat dan pelaksana dasar tanpa mengira agama dan bangsa. Bagi memperkasakan PDRM dan meningkatkan imej serta jati diri kepimpinan warga pasukan BAKA telah melaksanakan program-program berikut:

- i) Program Khalifah Talk yang melibat pimpinan tertinggi PDRM, program berteraskan Maqasid Syariah (tujuan syariah Islam dilaksanakan) bagi memelihara lima perkara iaitu menjaga agama, nyawa, akal, harta benda dan keturunan.

Bagi pegawai yang menganut lain-lain agama, program moral dan keagamaan adalah mengikut kesesuaian dan tuntutan agama masing-masing.

- ii) Program Penguasaan Quran (PPQ) secara berterusan yang dilaksanakan oleh semua peringkat kontinjen/ brigid dan formasi seluruh Negara bagi membudayakan Al-

## **SOALAN NO : 31**

Quran dalam kehidupan harian anggota rendah dan pegawai PDRM.

- iii) Menggalakkan semua peringkat jabatan / formasi menjalankan pengajaran aktiviti keagamaan setiap agama sebagaimana penganjuran kelas fardhu ain dan penekanan kepada ibadah solat dengan membudayakan solat fardhu berjamaah setiap waktu anggota PDRM yang beragama islam sehingga mampu mencegah kemungkaran seperti rasuah, salah guna kuasa serta jenayah.

### **2.4. Tindakan Punitif:**

Sebarang bentuk penglibatan pegawai PDRM dalam jenayah Macau Scam dan pengubahan wang haram, selain siasatan dan tindakan di bawah undang-undang yang berkuatkuasa termasuk POCA, pihak JIPS PDRM turut menjalankan siasatan tatatertib secara selari di bawah peruntukan Peraturan-Peraturan Pegawai Awam (Kelakuan dan Tatatertib) 1993 (PPPA (K&T) 1993) yang memperuntukan hukuman hingga dibuang kerja.

PDRM tidak berkompromi dengan mana-mana pegawai kanan polis atau pegawai rendah polis yang terlibat dengan sindiket macau scam dan tindakan sewajarnya akan diambil bagi memastikan imej PDRM tidak tercalar.

Inisiatif PDRM dalam menangani masalah ini adalah dengan menjalin kerjasama dengan pihak Suruhanjaya Komunikasi & Multimedia Malaysia dan Bank Negara Malaysia bagi memastikan semua penyedia perkhidmatan telekomunikasi dan pihak perbankan mematuhi setiap garis panduan yang telah ditetapkan bagi mengelakkan kebocoran maklumat pengguna daripada berlaku. Di samping itu juga, penggunaan Akta Perlindungan Data Peribadi 2010 harus diperluaskan agar rakyat sedar bahawa data peribadi mereka adalah dilindungi oleh peruntukan undang-undang.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB TUAN AHMAD JOHNNIE BIN ZAWAWI (IGAN)**

**TARIKH : 24 NOVEMBER 2020 (SELASA)**

**SOALAN**

**TUAN AHMAD JOHNNIE BIN ZAWAWI [ IGAN ]** minta **MENTERI DALAM NEGERI** menyatakan apakah Kementerian bercadang untuk membina balai polis baru termasuk kuarters anggota di Pekan Matu di dalam kawasan Parlimen Igan memandangkan sekarang mereka menumpang di Bangunan Persekutuan Matu.

**JAWAPAN**

Tuan Yang Di Pertua,

Balai Polis Matu beroperasi di bangunan Wisma Persekutuan Matu sejak tahun 2012. Balai Polis ini diketuai oleh seorang Ketua Polis Balai berpangkat Sarjan Mejar dengan dibantu oleh 15 orang Pegawai Pangkat Rendah dan seorang Kakitangan Awam. Kawasan sektor adalah seluas 247km persegi dengan kepadatan penduduk berjumlah 16,921 orang (berdasarkan bancian 2010). Indeks jenayah yang direkodkan pada tahun 2019 adalah sebanyak 13 kes manakala bagi tempoh 1 Januari 2020 hingga 30 September 2020 hanya sembilan (9) kes yang direkodkan.

Kementerian menyedari terdapat keperluan bagi pewujudan balai polis di daerah Matu berasaskan keluasan kawasan serta pembangunan setempat. Walau bagaimanapun, ianya tidak dapat dilaksanakan dalam masa terdekat ekoran keutamaan kepada cadangan projek lain yang lebih mendesak. Tindakan susulan untuk melaksanakan pembangunan di kawasan ini sedang diambil dan dijangkakan perancangan projek akan disenaraikan dalam masa terdekat bagi program pembangunan fizikal Rancangan Malaysia bagi memenuhi aspirasi dan harapan penduduk sekitar dalam menjaga keamanan serta keselamatan setempat.

Tapak cadangan projek balai polis ini adalah di Lot 269 *Matu Town District* seluas 3.05 ekar milik Pesuruhjaya Tanah Persekutuan untuk kegunaan PDRM. Namun keluasan tapak tanah ini tidak menepati syarat yang ditetapkan oleh Unit Perancang Ekonomi (EPU), Jabatan Perdana Menteri (JPM) dalam Garis Panduan dan Peraturan bagi Perancangan Bangunan Edisi Tahun 2015, Jawatankuasa Standard dan Kos. Syarat keluasan tanah yang diperlukan bagi pembangunan balai polis adalah di antara lima (5) hingga 10 ekar dengan sekurang-kurangnya memiliki 20 perjawatan.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB TUAN LIM LIP ENG (KEPONG)**

**TARIKH : 24 NOVEMBER 2020 (SELASA)**

**SOALAN**

**TUAN LIM LIP ENG [ KEPONG ]** minta **MENTERI DALAM NEGERI** menyatakan jumlah saksi yang telah dirakam keterangan bagi membantu siasatan semula kes kematian mendiang Teoh Beng Hock dan status terkini kes tersebut.

**JAWAPAN**

Tuan Yang Di Pertua,

Pihak PDRM telah membuka kembali Kertas Siasatan berhubung kes kematian Teoh Beng Hock yang ditemui mati pada 16 Julai 2009. Siasatan telah dibuka semula dibawah Seksyen 342 Kanun Keseksaan (Kurungan Salah). Kertas siasatan telah dirujuk ke Pejabat Peguam Negara pada 24 Februari 2020 dan pihak PDRM diminta untuk meneruskan siasatan dan mengemukakan kembali kertas siasatan ke pejabat Peguam Negara setelah siasatan lengkap dijalankan.

Untuk makluman, pihak polis telah menjalankan rakaman percakapan ke atas 13 orang saksi dan siasatan masih berjalan. Sehubungan itu, saya tidak berhasrat untuk mengulas lebih lanjut berhubung kes ini bagi mengelakkan ianya mengganggu siasatan.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB DATO' SERI DR. AHMAD ZAHID BIN HAMIDI  
(BAGAN DATUK)**

**TARIKH : 24 NOVEMBER 2020 (SELASA)**

**SOALAN**

**DATO' SERI DR. AHMAD ZAHID BIN HAMIDI [BAGAN DATUK]** minta **MENTERI DALAM NEGERI** menyatakan adakah terdapat sebarang perubahan *Standard Operating Procedur* (SOP) pengurusan pesakit di penjara bagi memastikan kes COVID-19 di dalam penjara tidak menjadi satu kluster yang besar.

**JAWAPAN**

Tuan Yang Di Pertua,

Untuk makluman Ahli Yang Berhormat, pihak Kementerian Dalam Negeri (KDN) dan Jabatan Penjara Malaysia telah mengambil beberapa pendekatan proaktif dalam mengekang penularan berterusan wabak COVID-19 di institusi penjara. Sebagai langkah pencegahan, Jabatan Penjara Malaysia telah mengeluarkan Perintah Tetap Komisioner Jeneral Penjara iaitu Pelan Kontingensi: Tatacara Mencegah Dan Bertindak Dalam Menghadapi Penularan Wabak COVID-19 Di Dalam Penjara.

Bagi membendung masalah ini, Jabatan Penjara Malaysia telah mengambil dan mengikuti segala prosedur operasi standard (SOP) yang telah ditetapkan oleh Kementerian Kesihatan Malaysia (KKM) untuk merawat, melaksanakan kuarantin dan mencegah penularan wabak tersebut kepada banduan dan kakitangan.

Selain itu, Jabatan Penjara Malaysia turut mempunyai perintah tetap jabatan yang antaranya menetapkan agar semua banduan sebelum diterima masuk ke penjara, perlu mempunyai keputusan ujian saringan COVID-19. Perintah tetap ini selaras dengan keputusan sidang khas Majlis Keselamatan Negara pada 15 Oktober 2020 yang telah bersetuju agar dilaksanakan ujian pengesanan COVID-19 kepada semua banduan semasa kemasukan bagi memastikan penularan COVID-19 di penjara dapat dicegah sepenuhnya.

Jabatan Penjara Malaysia juga telah melaksanakan arahan melalui Gerak Kerja Pelan Kontingensi COVID-19 dan antara langkah penting yang diberi penekanan dalam arahan ini, khususnya berkaitan kesihatan adalah:

- i. Menjalankan ujian *swab* ke atas semua anggota dan banduan yang mempunyai kontak rapat dengan individu yang positif COVID-19;



## SOALAN NO : 34

- ii. Memohon bantuan tenaga kerja perubatan dari Pusat Kesihatan Daerah (PKD) bagi menjalankan ujian *swab* dan melakukan proses nyahkuman;
- iii. Memastikan anggota yang bertugas tiada komplikasi penyakit kronik;
- iv. Memastikan setiap anggota yang masuk bertugas tidak mengalami gejala COVID-19 seperti batuk, selsema, demam dan sakit tekak;
- v. Pegawai Kesihatan hendaklah mendapatkan maklumat lokasi asal dan kenalpasti rangkaian semasa di luar penjara;
- vi. Peringkat pengasingan dan rawatan jangkitan COVID-19:
  - Peringkat 1- 2 – pengasingan dan rawatan di dalam penjara sahaja.
  - Peringkat 3-4 – pengasingan dan rawatan di luar penjara (hospital)
- vii. Pihak KKM boleh menggunakan mana-mana lokasi yang strategik dan lapangan di dalam kawasan penjara untuk kegunaan rawatan dan pengasingan sementara, seperti padang, bilik/dormitori/ruang bengkel kosong atau mana-mana ruang yang sesuai dan luas.

PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS

PERTANYAAN : LISAN

DARIPADA : PUAN ISNARAISSAH MUNIRAH MAJILIS  
[ KOTA BELUD ]

TARIKH : 24 NOVEMBER 2020 (SELASA)

**SOALAN**

PUAN ISNARAISSAH MUNIRAH MAJILIS [ KOTA BELUD ] minta MENTERI KESIHATAN menyatakan apakah Hospital Daerah Kota Belud akan dinaik taraf memandangkan keadaan hospital sekarang tidaklah sebaik dari segi fasiliti berbanding hospital-hospital daerah lain terutama sewaktu keadaan pandemik ini berlaku, mungkin beberapa fasiliti harus dinaik taraf kepada bangunan atau peralatan baru.

**JAWAPAN**

Tuan Yang di-Pertua,

1. Kementerian Kesihatan Malaysia (KKM) sedia maklum akan keperluan menaik taraf bangunan Hospital Kota Belud, Sabah yang telah uzur dan mencapai usia melebihi 35 tahun. **Sehubungan itu, di dalam Rancangan Malaysia Ke-11 (RMKe-11)**, KKM telah melaksanakan beberapa projek naik taraf di Hospital Kota Belud seperti:

- a. **Pembinaan Bangunan Unit Kecemasan Dan Trauma** pada tahun 2015 dengan kos RM2.5 juta;
- b. **Pembinaan Stor High Hemodialysis Unit (HDU) yang baru** pada 2017 dengan kos RM200 ribu; dan

- c. **Pembaikan Bumbung Unit Hasil, Outpatient Department (OPD), Pengurusan** dari tahun 2018 sehingga 2020 dengan kos sebanyak RM428 ribu.
2. Bagi tahun 2020 pula, **di bawah Peruntukan Belanja Pembangunan - 00600 (Naiktaraf, Ubahsuai Dan Pembaikan)**, KKM telah meluluskan kerja-kerja seperti berikut:-
- a. **Kerja Mengubahsuai Lantai Stor Penyimpanan Silinder Oksigen Farmasi Logistik**; dan
- b. **Pembaikan Siling Farmasi Pesakit Dalam Dan Galenikal**.
3. Bagi pelan jangka masa panjang pula, KKM bercadang **untuk membina Blok Klinikal Baru Hospital Kota Belud yang merangkumi Wad Pesakit Dalam, Dewan Bedah, Dewan Bersalin, Makmal Patologi dan perkhidmatan sokongan yang lain**. Cadangan projek ini akan dipohon dalam permohonan projek Rancangan Malaysia yang akan datang tertakluk kepada keutamaan dan kemampuan kewangan Kerajaan.

Tuan Yang di-Pertua,

4. Bagi menangani kenaikan kes COVID-19 di daerah Kota Belud, **kes-kes COVID-19 kategori 1 dan 2 dirawat di Pusat Kuarantin dan Rawatan COVID-19 di luar Hospital Kota Belud, iaitu Kota Belud Rest House dan PPR Seri Bayu**. Kes-kes kategori 3 hingga 5 pula akan dirujuk ke Hospital Queen Elizabeth yang merupakan Hospital COVID-19. Ini membolehkan Hospital Kota Belud terus menyediakan rawatan bagi kes-kes bukan COVID-19.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB DATIN PADUKA DR. TAN YEE KEW  
(WANGSA MAJU)**

**TARIKH : 24 NOVEMBER 2020 (SELASA)**

**SOALAN**

**DATIN PADUKA DR. TAN YEE KEW [ WANGSA MAJU ]** minta **MENTERI DALAM NEGERI** menyatakan adakah Kerajaan mempertimbangkan untuk meminda Perlembagaan bagi membenarkan laporan DNA menjadi bukti sahih ikatan hubungan seorang bapa dan anaknya bagi memohon kewarganegaraan melibatkan kanak-kanak yang tidak mempunyai Sijil Kelahiran.

**JAWAPAN**

**Tuan Yang Di-Pertua,**

Kewarganegaraan seseorang individu ditentukan berdasarkan kepada **status perkahwinan dan taraf kewarganegaraan ibu bapa kandung sewaktu kelahiran berlaku**. Buat masa ini, Kerajaan hanya menggunakan **keputusan Ujian *Deoxyribonucleic Acid* (DNA) sebagai dokumen sokongan** berkaitan permohonan dokumen pengenalan diri **bagi mengesahkan pertalian darah** seseorang dengan ahli keluarga yang lain dan tidak dijadikan sebagai bukti konklusif dalam penganugerahan kewarganegaraan Malaysia. Dalam hal ini, setiap pemohon masih perlu mematuhi undang-undang lain khususnya berkaitan dengan pendaftaran perkahwinan ibu bapa dan mempunyai bukti keberadaan di Persekutuan.

Untuk makluman Ahli Yang Berhormat, setiap kelahiran yang berlaku di Malaysia hendaklah didaftarkan di Jabatan Pendaftaran Negara (JPN) selaras dengan Akta Pendaftaran Kelahiran dan Kematian 1957 (Akta 299) bagi Semenanjung Malaysia, Ordinan Pendaftaran Kelahiran dan Kematian (*Sabah Chapter 123*) 1951 bagi Negeri Sabah, dan Ordinan Pendaftaran Kelahiran dan Kematian (*Sarawak Chapter 10*) 1951 bagi Negeri Sarawak. Ketiga-tiga undang-undang tersebut jelas menyatakan **tanggungjawab ibu bapa atau mana-mana individu yang mengetahui tentang kelahiran** untuk mendaftarkan kelahiran berkenaan kepada JPN tanpa mengira taraf kewarganegaraan, keturunan atau latar belakang.

Sukacita diingatkan bahawa ibu bapa dan penjaga kepada individu yang bertaraf 'Belum Ditentukan' atau 'Bukan Warganegara' bertanggungjawab sepenuhnya untuk menguruskan kewarganegaraan, dokumen pengenalan diri dan dokumen perjalanan dengan negara asal bagi mengelakkan ketiadaan dokumen pengenalan diri, keberadaan tidak sah di Malaysia dan seterusnya disalah anggap sebagai tidak memiliki kewarganegaraan dari mana-mana negara (*stateless*).

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : PUAN VIVIAN WONG SHIR YEE (SANDAKAN)**

**TARIKH : 24 NOVEMBER 2020 (SELASA)**

**SOALAN**

**PUAN VIVIAN WONG SHIR YEE [ SANDAKAN ]** minta **MENTERI DALAM NEGERI** menyatakan apakah langkah-langkah konkrit yang telah diambil oleh Kerajaan selepas menarik balik pengeluaran pas IMM13 pada bulan Jun 2020 dalam penyelesaian isu pendatang asing tanpa izin dan orang tanpa kewarganegaraan di Sabah.

**JAWAPAN**

**Tuan Yang Di Pertua,**

Mohon izin supaya soalan daripada YB Penampang ini dijawab bersekali dengan soalan bernombor 12841 daripada YB Penampang dan soalan bernombor 12771 daripada YB Sepanggar memandangkan semua soalan yang diutarakan menyentuh isu yang sama iaitu pengurusan pendatang dan warga asing di Sabah.

Seperti Ahli Yang Berhormat sedia maklum, Jawatankuasa Pengurusan Warga Asing di Sabah (JKPWAS) telah ditubuhkan oleh Kerajaan susulan daripada syor Suruhanjaya Siasatan Diraja (*Royal Commission of Inquiry* - RCI) Mengenai Pendatang Asing di Sabah bertujuan untuk mengkaji dan membincangkan isu berkaitan pendatang dan orang asing di Sabah. Sehubungan itu, Kementerian sedang mengkaji cadangan penggunaan Pas IMM13 bagi menggantikan dokumen-dokumen sedia ada

seperti Kad Burung-Burung dan Sijil Banci di Sabah secara teliti dan berhati-hati dengan penglibatan Kerajaan Negeri Sabah melalui JKPWAS.

Komposisi JKPWAS yang merangkumi JKPWAS Induk yang dipengerusikan secara bersama oleh YB Menteri Dalam Negeri dengan YAB Ketua Menteri Sabah serta JKPWAS Teknikal yang dipengerusikan oleh YB Timbalan Menteri Dalam Negeri adalah merupakan platform terbaik bagi mencari penyelesaian berkenaan pengurusan pendatang dan orang asing di Sabah. Ini adalah kerana keahlian kedua-dua Jawatankuasa tersebut yang merangkumi penglibatan Jabatan/Agensi/Bahagian peringkat Persekutuan dan Negeri seperti Jabatan Ketua Menteri (JKM) Sabah, Jabatan Pendaftaran Negara (JPN), Jabatan Imigresen Malaysia (JIM), Polis Diraja Malaysia (PDRM), Majlis Keselamatan Negara (MKN) serta beberapa Jabatan/Agensi yang lain.

Dengan mengambil kira pembentukan Kerajaan Negeri Sabah yang baharu serta kepentingan keselamatan negara dan negeri Sabah khususnya, cadangan ini akan diperhalusi dan dibincangkan tertakluk kepada hala tuju dan persetujuan antara Kerajaan Persekutuan dan Kerajaan Negeri Sabah yang baharu. Ini bagi memastikan setiap usaha yang dilaksanakan oleh Kerajaan dapat diterima dan difahami oleh semua pihak yang berkepentingan serta mengelakkan daripada isu pendatang dan warga asing terus membelenggu pembangunan ekonomi dan sosial di negeri Sabah.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB TUAN TAN KOK WAI (CHERAS)**

**TARIKH : 24 NOVEMBER 2020 (SELASA)**

**SOALAN**

**TUAN TAN KOK WAI [ CHERAS ]** minta **MENTERI DALAM NEGERI** menyatakan perkembangan terkini penyiasatan dan tindakan susulan yang diambil berkaitan dengan satu laporan polis (No Laporan Cheras 021515/20) pada 10 Oktober 2020 serta laporan yang dibuat kepada Ketua Polis Kuala Lumpur pada 15 Oktober oleh 7 pengadu berkenaan penyalahgunaan kuasa dan salah laku anggota polis.

**JAWAPAN**

**Tuan Yang Di Pertua,**

Untuk makluman, siasatan telah dijalankan bersabit Cheras Repot 21515/2020 bertarikh 10 Oktober 2020 di bawah Seksyen 147 Kanun Keseksaan (Merusuh). Laporan polis dibuat berkaitan tiga (3) orang anggota RELA yang sedang bertugas di kawasan Pasar Taman Cheras telah dipukul oleh 5 orang lelaki India. Kes masih dalam siasatan pihak polis. Sehubungan itu, saya tidak bercadang untuk menghuraikan dengan lebih lanjut sehingga boleh menjejaskan siasatan.

Walau bagaimanapun, saya memberi jaminan bahawa pihak Polis Diraja Malaysia (PDRM) tidak akan berkompromi dengan pegawai atau anggota polis yang menyalahguna kuasa dan terlibat dalam salah laku yang mana tindakan tatatertib akan dijalankan terhadap pegawai atau anggota polis yang terlibat.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB TUAN CHARLES ANTHONY A/L SANTIAGO  
(KLANG)**

**TARIKH : 24 NOVEMBER 2020 (SELASA)**

**SOALAN**

**TUAN CHARLES ANTHONY SANTIAGO [ KLANG ]** minta **MENTERI DALAM NEGERI** menyatakan statistik terkini bilangan orang yang ditahan dalam pusat tahanan imigresen di seluruh negara mengikut pecahan kewarganegaraan, umur, tempoh penahanan dan jantina. Apakah cadangan untuk mengawal penularan wabak COVID-19 di pusat tahanan dan statistik pelarian wanita yang mendapat rawatan di OSCC tetapi tidak berjaya akibat tidak memiliki dokumen sah.

**JAWAPAN**

**Tuan Yang Di Pertua,**

Untuk makluman Ahli Yang Berhormat, sehingga 13 November 2020, jumlah tahanan semasa di Depot Tahanan Imigresen yang direkodkan oleh Jabatan Imigresen Malaysia (JIM) adalah seramai 13,103 orang yang terdiri daripada pelbagai warganegara. Daripada jumlah tersebut, warganegara Myanmar mencatatkan jumlah tertinggi iaitu seramai 4,534 orang, diikuti oleh warganegara Indonesia iaitu seramai 4,130 orang, warganegara Bangladesh iaitu seramai 1,310 orang dan lain-lain warganegara iaitu seramai 3,129 orang.

Kementerian Dalam Negeri (KDN) dan JIM sentiasa memastikan tahap kesihatan yang baik di kalangan tahanan di Depot Tahanan Imigresen.

## **SOALAN NO : 39**

Dengan peningkatan jumlah tahanan sepanjang tempoh Perintah Kawalan Pergerakan (PKP), pihak JIM mengambil langkah-langkah mengekang penularan wabak COVID-19 di kalangan tahanan dengan mewajibkan saringan COVID-19 ke atas semua tahanan baharu serta disahkan sihat daripada wabak tersebut.

Selain itu, saringan gejala seperti demam, batuk dan selsema akan dilaksanakan secara berkala terhadap semua tahanan oleh Penolong Pegawai Perubatan yang bertugas di Depot Tahanan Imigresen. Tahanan yang mempunyai gejala akan diasingkan dan segera dibawa ke hospital atau klinik terdekat bagi mendapatkan rawatan. Pihak JIM turut mendapatkan kerjasama daripada Jabatan Penjara Malaysia untuk menggunakan fasiliti penjara dan lain-lain fasiliti bagi tujuan penempatan tahanan imigresen untuk mengelakkan kepadatan yang terlalu tinggi di Depot Tahanan Imigresen sedia ada.

Dari aspek kesihatan tahanan, pihak JIM bekerjasama dengan Kementerian Kesihatan Malaysia (KKM) untuk menempatkan 14 orang Penolong Pegawai Perubatan di Depot Tahanan Imigresen di seluruh negara bagi memberikan rawatan awal kepada tahanan. Klinik kesihatan yang berhampiran telah dikenalpasti dan dipilih oleh KKM bagi memperkukuh perkhidmatan kesihatan di Depot Tahanan Imigresen serta berperanan sebagai pusat rujukan oleh Penolong Pegawai Perubatan yang dilantik dan sebagai pembekal keperluan perubatan ke depot-depot. Pemantauan kesihatan secara berkala turut dilakukan oleh KKM ke Depot Tahanan Imigresen dari semasa ke semasa.

**PEMBERITAHUAN PERTANYAAN BERTULIS DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : YB RUBIAH BINTI HAJI WANG  
[KOTA SAMARAHAN]**

**TARIKH : 24 NOVEMBER 2020**

**SOALAN**

**PUAN RUBIAH BINTI HAJI WANG [KOTA SAMARAHAN]** minta **MENTERI SUMBER MANUSIA** menyatakan pendekatan terkini Kerajaan menangani isu kehilangan pekerjaan dan pengangguran khususnya dalam tempoh Perintah Kawalan Pergerakan khasnya dalam sektor pelancongan dan penerbangan.

**JAWAPAN**

**Tuan Yang di-Pertua,**

1. Untuk makluman Ahli-Ahli Dewan Yang Mulia ini, Jabatan Perangkaan Malaysia (DOSM) menganggarkan julat maksimum kadar pengangguran adalah dalam lingkungan 3.5 peratus hingga 5.5 peratus pada tahun ini susulan daripada pandemik Covid-19.
2. Berdasarkan data terkini Survei Tenaga Buruh DOSM, kadar pengangguran di Malaysia pada bulan September 2020 turun 0.1 mata peratus kepada 4.6% berbanding Ogos 2020. Bilangan penganggur turun 0.6 peratus merekodkan 737.5 ribu orang (Ogos 2020: 741.6 ribu orang)
3. Data Kementerian menunjukkan jumlah pemberhentian pekerja yang dilaporkan oleh Sistem Insurans Pekerjaan (SIP) PERKESO adalah seramai 95,995 orang sehingga 13 November 2020. Berdasarkan laporan terkini penempatan pekerjaan oleh MYFutureJobs sehingga 6 November

2020, seramai 106,937 orang daripada 375,431 pencari kerja telah berjaya mendapat pekerjaan.

4. Pada Ogos 2020, penarikan semula sekatan mendorong kepada permintaan yang lebih tinggi dan hampir semua sektor memperoleh semula momentumnya termasuk industri pelancongan. Oleh itu, perniagaan yang berkaitan dengan industri ini seperti penginapan, makanan & minuman, pengangkutan & hiburan juga mengalami impak positif.

5. Seterusnya, perniagaan mula menawarkan pengambilan semula secara beransur-ansur termasuk mereka yang menganggur atau diberhentikan kerja. Peruntukan RM1 bilion dalam Skim Pembiayaan Pelancongan PENJANA turut memanfaatkan perniagaan terutamanya Perusahaan Kecil dan Sederhan (PKS) serta syarikat mikro untuk memulihkan industri pelancongan.

**Tuan Yang di-Pertua,**

6. Dalam mendepani situasi pengangguran di Malaysia serta memperkasakan rakyat, Kerajaan telah mengumumkan Pelan Jana Semula Ekonomi Negara (PENJANA) bertujuan membantu mereka yang kehilangan sumber pendapatan untuk mendapatkan pekerjaan, melindungi pekerjaan dan meningkatkan kemahiran. Rakyat akan dapat memanfaatkan peluang semasa ekonomi beransur pulih melalui Inisiatif PENJANA tersebut.

7. Lima (5) inisiatif PENJANA di bawah Kementerian Sumber Manusia adalah Pelaksanaan Program Subsidi Upah, Menaik Taraf Portal Perkhidmatan Pekerjaan Negara, Program Insentif Pengambilan Pekerja dan Bantuan Latihan, Program Kemahiran dan Peningkatan Kemahiran dan Perlindungan Sosial dan Latihan bagi Pekerja Ekonomi Gig.

8. Program Subsidi Upah (PSU 1.0) dan pelanjutan Program Subsidi Upah (PSU) 2.0 telah membantu majikan yang terkesan supaya dapat meneruskan operasi syarikat serta mengelakkan pekerja hilang pekerjaan. Program ini telah melibatkan pengagihan dana Kerajaan berjumlah RM2.4 billion dengan sasaran seramai 1.3 juta pekerja. Melalui PSU 1.0, sejumlah 331,569 syarikat dan 2.72 juta pekerja telah menerima

manfaat ini. Sehingga 30 Oktober 2020, PERKESO telah menyalurkan bantuan kepada 54,865 majikan dan 550,422 pekerja melalui program PSU 2.0.

9. Kerajaan telah memperuntukkan sejumlah RM1.5 billion kepada PERKESO untuk Program Insentif Pengambilan Pekerja dan Bantuan Latihan. Program ini merangkumi insentif pengambilan pekerja, peningkatan kemahiran pekerja dan penganggur, bantuan perpindahan, dan kerjasama dengan agensi pekerjaan swasta sehingga tempoh 6 bulan. Program ini telah berjaya membantu sejumlah 73,773 ribu pekerja sehingga 30 Oktober 2020.

10. Kementerian juga melalui Pembangunan Sumber Manusia Berhad (PSMB), telah melancarkan Inisiatif PENJANA HRDF pada 22 Jun 2020. Lima (5) skim telah diperkenalkan yang memberi penekanan terhadap latihan dan peningkatan kemahiran pekerja (*upskilling* dan *reskilling*) iaitu *Place and Train*, *B40 Development*, *SME Development*, *Industry Revolution 4.0* dan Gerak Insan Gemilang (GIG).

**Untuk makluman Ahli Yang Berhormat,**

11. Dalam usaha kerajaan untuk memperkasakan rakyat, Kementerian melalui PSMB telah dipertanggungjawabkan untuk turut menyelaraskan pelaksanaan program PENJANA *Upskilling & Reskilling* dengan jumlah peruntukan sebanyak RM2 bilion. Program kemahiran dan peningkatan kemahiran ini sedang dilaksanakan merentasi Lapan (8) Kementerian dan Agensi dan akan memanfaatkan sejumlah 200,000 belia dan golongan penganggur.

12. PENJANA *Upskilling & Reskilling* akan membantu belia dan golongan penganggur dalam mendapatkan pekerjaan baharu (*new jobs*), menghasilkan usahawan baharu (*new entrepreneurs*) atau pengekalan pekerjaan (*job retention*). Sehingga kini, sejumlah RM500 juta peruntukan yang telah disalurkan dan 102,000 pelatih yang telah diluluskan untuk mengikuti pelbagai program dibawah PENJANA *Upskilling & Reskilling* ini. Langkah ini dijangka akan terus membantu mengurangkan kadar pengangguran Negara ke aras yang lebih stabil.

13. Kementerian juga telah mengambil langkah pro aktif bersama Kementerian Kewangan untuk memantau dan menyelaraskan

pelaksanaan inisiatif-inisiatif berkaitan sumber manusia tersebut dengan menubuhkan Jawatankuasa Pekerjaan Nasional (JKPN) pada Jun 2020. Objektif Jawatankuasa ini adalah untuk memantau keadaan pasaran buruh dan pengangguran negara, menyelaraskan pelaksanaan inisiatif PENJANA serta dan memantau keberkesanan inisiatif-inisiatif tersebut.

**Tuan Yang di-Pertua,**

14. Melalui ucapan Belanjawan 2021 oleh Menteri Kewangan baru-baru ini, Kerajaan akan meneruskan inisiatif pengambilan pekerja di bawah PERKESO yang kini dikenali sebagai PenjanaKerjaya dengan sejumlah RM2 bilion ringgit diperuntukkan dan dijangka dapat menyediakan peluang pekerjaan kepada 250 ribu pencari kerja.

15. Kerajaan juga akan melanjutkan pelaksanaan Program Subsidi Upah selama tiga bulan lagi dengan lebih bersasar, khususnya bagi sektor pelancongan serta sektor peruncitan dengan kadar RM600 ringgit sebulan bagi pekerja bergaji RM4,000 dan ke bawah. Selain itu, had 200 pekerja bagi setiap permohonan akan ditingkatkan kepada 500 pekerja. Sebanyak RM1.5 bilion ringgit diperuntukkan dan dijangka akan membantu 70 ribu majikan dan 900 ribu pekerja.

16. Pada masa ini, Kerajaan melalui PERKESO membantu pekerja yang kehilangan pekerjaan melalui pemberian Elaun Mencari Pekerjaan. Elaun ini diberi selama enam bulan di mana bulan pertama layak menuntut 80 peratus gaji dan secara beransur-ansur berkurang kepada 30 peratus gaji. Sehubungan itu, bagi tahun 2021, tempoh Elaun Mencari Kerja akan dilanjutkan selama tiga bulan dan kadar layak menuntut daripada 80 peratus gaji bagi bulan pertama, 50 peratus bagi bulan kedua hingga keenam dan seterusnya 30 peratus bagi tiga bulan terakhir. Bagi tujuan ini, peruntukan sebanyak RM150 juta ringgit akan disediakan dan dijangka memanfaatkan sehingga 130 ribu orang pencari kerja.

17. Kerajaan akan sentiasa berusaha agar kadar pengangguran di Malaysia adalah terkawal dan memastikan rakyat mampu mendepani saat-saat sukar yang belum pernah dialami oleh Negara sebelum ini.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGKAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : PUAN JUNE LEOW HSIAD HUI  
[ HULU SELANGOR ]**

**TARIKH : 24 NOVEMBER 2020 (SELASA)**

**SOALAN**

Minta **MENTERI PERTANIAN DAN INDUSTRI MAKANAN** menyatakan jumlah permohonan Geran Agropreneur Muda yang diterima dan jumlah diluluskan serta bagaimana Kementerian memastikan penerima geran terlibat secara aktif dalam sektor pertanian dan menyumbang kepada peningkatan ekonomi negara.

**JAWAPAN**

**Tuan Yang di-Pertua,**

1. Untuk makluman, pelaksanaan Program Agropreneur Muda Kementerian melalui Unit Agropreneur Muda (UAM) mendapat sambutan yang menggalakkan setiap tahun. Bagi tahun 2020, sehingga 15 November 2020, Kementerian telah meluluskan sebanyak 879 permohonan berjumlah RM16.6 juta. Kadar permohonan dan kelulusan Geran Agropreneur Muda tertinggi adalah pada tahun 2017 iaitu seramai 3,190 permohonan yang berjumlah RM54.8 juta.
2. Secara keseluruhannya, seramai 6,646 orang agropreneur muda seluruh negara telah menerima kelulusan Geran Agropreneur Muda dari 1 Januari 2016 hingga 15 November 2020 yang berjumlah RM 116.7 juta seperti berikut:

a) Sektor Tanaman	- 2,695 orang	(RM 46.4 juta)
b) Sektor Perikanan	- 542 orang	(RM 11.1 juta)
c) Sektor Ternakan	- 1,259 orang	(RM 26.3 juta)
d) Sektor Industri Makanan	- 2,150 orang	(RM 32.9 juta)

3. Untuk makluman Ahli Yang Berhormat, Kementerian sentiasa mempergiat usaha demi memastikan penerima geran sentiasa aktif dan menyumbang kepada ekonomi negara. Antara usaha yang dilaksanakan adalah:

- i. Menetapkan inisiatif di dalam laporan Hala Tuju Ke-3 MAFI iaitu mengekalkan peserta geran dalam program agromakanan selepas 3 tahun;
- ii. Kementerian secara aktif menjemput agropreneur muda mengikuti latihan, kursus-kursus webinar, sesi taklimat Geran Agropreneur Muda dan sesi perkongsian kisah-kisah kejayaan agropreneur muda.
- iii. Mengenalpasti dan melantik Ikon Agropreneur Muda berdasarkan pencapaian yang cemerlang dan diketengahkan dalam kisah kejayaan bertujuan untuk mewujudkan usahawan *role-model* kepada golongan muda;
- iv. Pemantauan secara berkala, khidmat bimbingan, latihan serta konsultasi yang berterusan disediakan kepada para agropreneur muda melalui jabatan dan agensi MAFI; dan
- v. Sebanyak 18 Jelajah Agropreneur Muda (JAM) dan lawatan kerja telah diadakan sepanjang tahun 2020 yang melibatkan 10 buah negeri. Program JAM ini berkonsepkan lawatan turun padang ke projek pertanian agropreneur muda (*walkabout*), kursus, promosi, pemasaran dan perjumpaan bersama para belia setempat.

Sekian, terima kasih.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB PUAN MARIA CHIN ABDULLAH (PETALING JAYA)**

**TARIKH : 24 NOVEMBER 2020 (SELASA)**

**SOALAN**

**PUAN MARIA CHIN BINTI ABDULLAH [ PETALING JAYA ]** minta **MENTERI DALAM NEGERI** menyatakan bilangan kes-kes kematian terkini dalam tahanan di lokap polis, penjara dan pusat tahanan imigresen dan apakah usaha untuk menangani masalah ini.

**JAWAPAN**

**Tuan Yang Di Pertua,**

Untuk makluman Ahli Yang Berhormat, statistik terkini kematian orang tahanan dalam lokap Polis Diraja Malaysia (PDRM), penjara dan depot tahanan Imigresen bermula dari 1 Januari 2020 hingga 30 September 2020 adalah seramai 335 tahanan yang mana pecahannya adalah 9 tahanan lokap PDRM, 296 tahanan penjara dan 30 tahanan di depot Imigresen.

Antara langkah-langkah yang diambil pihak PDRM untuk meminimalkan kes-kes kematian dalam lokap khususnya yang disabitkan oleh penyakit adalah dengan menyediakan SOP yang lebih ketat termasuk dalam menguruskan tahanan sakit, rondaan yang lebih kerap di sel pada waktu malam, penyediaan bilik rawatan dan pembantu perubatan serta penambahan kakitangan yang menguruskan tahanan.

Keselamatan banduan juga sememangnya merupakan antara tanggungjawab utama Jabatan Penjara Malaysia. Oleh itu langkah-langkah kawalan, pemeriksaan, pengasingan penempatan, ujian psikologi, risikan maklumat, pemantauan rapi serta kemudahan kesihatan sentiasa dilakukan untuk mengelakkan keselamatan seseorang banduan terancam. Malah Jabatan Penjara mempunyai standard prosedur kerja atau perintah tetap Komisioner Jeneral Penjara bagi tujuan pengurusan semua aspek banduan termasuklah keselamatan.

**Tuan Yang Di Pertua,**

Jabatan Imigresen Malaysia (JIM) juga sentiasa menitikberatkan hal ehwal kebajikan tahanan di Depot Tahanan Imigresen dengan menyediakan penjagaan khas serta perlindungan terhadap mereka semasa dalam tahanan. Prosedur pengurusan tahanan yang berada dalam Depot Tahanan Imigresen adalah berpandukan Arahan Tetap Ketua Pengarah Imigresen Mengenai Prosedur Pentadbiran dan Pengurusan Depot Imigresen.

Sebagai langkah bagi memastikan tahap kesihatan yang baik di kalangan tahanan, pihak JIM telah bekerjasama dengan Kementerian Kesihatan Malaysia (KKM) untuk menempatkan 14 orang Penolong Pegawai Perubatan di Depot Tahanan Imigresen di seluruh negara bagi memberikan rawatan awal kepada tahanan. Klinik kesihatan yang berhampiran telah dikenalpasti dan dipilih oleh KKM bagi memperkukuh perkhidmatan kesihatan di Depot Tahanan Imigresen serta berperanan sebagai pusat rujukan oleh Penolong Pegawai Perubatan yang dilantik dan sebagai pembekal keperluan perubatan ke depot-depot.

Pemantauan kesihatan secara berkala turut dilakukan oleh KKM ke Depot Tahanan Imigresen dari semasa ke semasa. Selain itu, JIM turut melaksanakan tindakan pencegahan pencegahan dan aktiviti kawalan untuk memastikan kesejahteraan tahanan di Depot Tahanan Imigresen.

PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS

PERTANYAAN : LISAN

DARIPADA : DATUK SERI DR HJ DZULKEFLY AHMAD  
[ KUALA SELANGOR ]

TARIKH : 24 NOVEMBER 2020 (SELASA)

**SOALAN**

DATUK SERI DR. HAJI DZULKEFLY BIN AHMAD [ KUALA SELANGOR ] minta MENTERI KESIHATAN menyatakan apakah statistik terkini penerima PeKa B40, dan apakah pelan Kementerian untuk menambah baik pelan sedia ada terutamanya dari segi ketersampaian kepada penduduk golongan B40.

**JAWAPAN**

Tuan Yang di-Pertua,

1. Skim PeKa B40 mula dilaksanakan pada 15 April 2019 di seluruh negara sebagai projek perintis untuk kumpulan B40 yang merupakan penerima Bantuan Sara Hidup (BSH) dan pasangannya yang berdaftar, dan berumur 40 tahun dan ke atas.

2. PeKa B40 menawarkan empat (4) manfaat iaitu Manfaat 1: Saringan Kesihatan, Manfaat 2: Bantuan Alat Perubatan, Manfaat 3: Insentif Melengkapkan Rawatan Kanser dan Manfaat 4: Insentif Tambang Pengangkutan.

3. PeKa B40 telah memanfaatkan rakyat dari kumpulan B40 khususnya dalam membantu menampung keperluan kesihatan bagi kumpulan ini. Sehingga 31 Oktober 2020, seramai :

- a. 434,277 penerima telah menjalankan saringan kesihatan di bawah Manfaat 1;

- b. 13,514 permohonan diluluskan bagi **Manfaat 2**;
- c. 3,916 permohonan diluluskan bagi **Manfaat 3**; dan
- d. 13,039 permohonan diluluskan bagi **Manfaat 4**.

Tuan Yang di-Pertua,

4. Kementerian Kesihatan Malaysia (KKM) berusaha menambahbaik skim PeKa B40 termasuklah meningkatkan mutu dan kualiti perkhidmatan kesihatan yang diterima. Melalui skim ini, audit perubatan dibuat ke atas pengamal perubatan primer dan juga meneliti kos efisiensi pembelian peralatan kesihatan melalui rundingan harga dengan pembekal untuk mendapatkan kos yang terbaik.

5. Selain itu, KKM juga berusaha untuk menjalankan projek rintis Program Wellness PeKa B40 (dengan izin) dan ini adalah satu inisiatif untuk mempromosikan cara hidup sihat di kalangan penerima PeKa B40 yang belum mempunyai penyakit tidak berjangkit. Objektif Program *Wellness* adalah bagi memastikan mereka kekal sihat selaras dengan usaha KKM untuk mencegah dan mempromosikan kesihatan yang menjadi salah satu tunggak utama dalam Agenda Nasional Malaysia Sihat (ANMS) 2020-2030.

6. Kerajaan juga telah menambah peruntukan skim PeKa B40 hampir dua kali ganda dari jumlah asal (iaitu RM130 juta berbanding RM70 juta) dan dengan ini, lebih ramai lagi rakyat kumpulan B40 dapat menikmati manfaat yang ditawarkan.

7. Usaha PeKa B40 tetap diteruskan dengan mematuhi SOP semasa yang berkuatkuasa bersama Jabatan Penerangan, organisasi bukan Kerajaan (NGO), promosi dan perkongsian maklumat menerusi media sosial PeKa B40 seperti *Facebook*, *Instagram* dan *Twitter* khusus untuk ahli keluarga penerima yang aktif media sosial. Pelaksanaan aktiviti saringan kesihatan PeKa B40 masih dijalankan oleh klinik kesihatan kerajaan dan klinik perubatan swasta umum (GP) PeKa B40.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB TUAN ANYI NGAU (BARAM)**

**TARIKH : 24 NOVEMBER 2020 (SELASA)**

**SOALAN**

**TUAN ANYI NGAU [ BARAM ]** minta **MENTERI DALAM NEGERI** menyatakan perancangan pihak Kementerian berkenaan pengwujudan IPD di daerah Telang Usan dan Beluru yang telah dinaikkan taraf ke status daerah penuh sejak 5 tahun lepas. Nyatakan juga perancangan Kementerian berkenaan Balai Polis di daerah kecil Bario.

**JAWAPAN**

Tuan Yang Di Pertua,

Beluru terletak di bawah pentadbiran Ibu Pejabat Daerah (IPD) Marudi manakala Telang Usan pula di bawah pentadbiran IPD Miri. Buat masa ini, jumlah penduduk di daerah Beluru adalah seramai 29,366 orang dan di daerah Telang Usan adalah seramai 25, 316 orang. Keluasan pentadbiran daerah Beluru ialah 4904 km persegi manakala daerah Telang Usan seluas 9829 km persegi.

Berdasarkan kajian yang telah dilaksanakan oleh pihak PDRM, Kementerian belum bercadang untuk mewujudkan IPD di daerah Telang Usan dan Beluru buat masa ini memandangkan tiada keperluan mendesak dan terdapat IPD berdekatan. Pada masa yang sama, Garis Panduan dan Peraturan bagi Perancangan Bangunan Edisi Tahun 2015, Jawatankuasa Standard dan Kos, Unit Perancang Ekonomi telah menetapkan sebuah IPD boleh dibangunkan jika jumlah jawatan pegawai dan anggota di kawasan berkenaan sekurang-kurangnya 150 orang dan pihak Kerajaan Negeri telah menyediakan tanah berkeluasan di antara 10-15 ekar untuk tujuan pembinaan IPD.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : PUAN TEO NIE CHING [ KULAI ]**

**TARIKH : 24 NOVEMBER 2020 (SELASA)**

**SOALAN**

**PUAN TEO NIE CHING [ KULAI ]** minta **MENTERI DALAM NEGERI** menyatakan sama ada Timbalan Menteri Pembangunan Wanita, Keluarga dan Masyarakat dan Utusan Malaysia akan disiasat di bawah Akta Kanak-Kanak atas kecuai dan kegagalan dalam melindungi hak anak kepada mangsa pembunuhan pada 5 Ogos yang lalu.

**JAWAPAN**

Tuan Yang Dipertua,

Pihak polis telah menjalankan siasatan berkaitan artikel yang diterbitkan di dalam surat khabar Utusan Malaysia bertarikh 5 Ogos 2020. Artikel tersebut telah memaparkan gambar YB Timbalan Menteri Kementerian Pembangunan Wanita, Keluarga dan Masyarakat (KPWKM) bersama seorang kanak-kanak yang merupakan anak kepada mangsa kes bunuh. Gambar yang sama turut dipaparkan di dalam akaun peribadi Instagram milik YB Timbalan Menteri tersebut.

Kes ini telah diklasifikasikan di bawah Seksyen 15 Akta Kanak-Kanak 2001 berkaitan sekatan ke atas laporan dan penyiaran media. Kes ini masih dalam siasatan dan kertas siasatan telah dirujuk kepada pihak Jabatan Peguam Negara untuk mendapatkan nasihat dan arahan selanjutnya.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : YB TUAN AHMAD BIN HASSAN [PAPAR]**

**TARIKH : 24 NOVEMBER 2020 (SELASA)**

**SOALAN**

**TUAN AHMAD BIN HASSAN [PAPAR]** minta **MENTERI SUMBER MANUSIA** menyatakan signifikan usaha sama Kementerian dengan Unit Psikiatri hospital awam menerusi program *RESTART* kepada pesakit-pesakit mental di negeri Sabah bagi mendapatkan peluang kerjaya tanpa memerlukan mereka bermusafir ke Semenanjung.



**JAWAPAN**

Tuan Yang di-Pertua,

1. Untuk makluman Ahli-Ahli Dewan Yang Mulia ini, Kementerian Sumber Manusia melalui PERKESO telah menjalin kerjasama dengan Jabatan Psikiatri & Kesihatan Mental di hospital-hospital Kementerian Kesihatan Malaysia menerusi program **kembali bekerja atau *RESTART (Re-employment, support, treatment and rehabilitation team)*** sejak tahun 2017.

2. Projek ini bermula dengan pelaksanaan projek secara *pilot* di enam buah hospital dan Pusat Kesihatan Mental Masyarakat (Mentari). Signifikan usaha sama Kementerian Sumber Manusia dengan Unit Psikiatri hospital awam ini adalah bagi membantu pesakit yang mengalami masalah mental untuk dipulihkan menerusi Program Sokongan Pekerjaan bagi mengembalikan hak pesakit mental sebagai individu yang berhak diberikan peluang bekerja seterusnya menjalani kehidupan bebas dari stigma dan diskriminasi.

3. Sehingga kini, sebanyak 48 peratus daripada 83 peserta program ini telah dibantu dalam penempatan pekerjaan yang melibatkan bekas pesakit dari enam buah hospital tersebut. Jika projek ini diperluaskan ke Negeri Sabah, para pesakit tidak perlu bermusafir ke Semenanjung bagi mendapatkan pekerjaan yang pastinya akan melibatkan kos sara hidup yang tinggi.

Sekian, terima kasih.

PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS

PERTANYAAN : LISAN

DARIPADA : DATUK SERI HAJI SALAHUDDIN BIN AYUB  
[ PULAI ]

TARIKH : 24 NOVEMBER 2020 (SELASA)

**SOALAN**

DATUK SERI HAJI SALAHUDDIN BIN AYUB [PULAI] minta MENTERI KESIHATAN menyatakan adakah terdapat kemungkinan ujian klinikal COVID-19 melalui swab tercemar semasa sampel diambil seterusnya menghasilkan keputusan "*false positive*" terhadap pesakit.

**JAWAPAN**

Tuan Yang di-Pertua,

1. Ujian *Reverse Transcription - Polymerase Chain Reaction* (RT-PCR) adalah ujian kualitatif untuk mengesan asid nukleik dari SARS-CoV-2 (COVID-19) pada spesimen pernafasan atas dan bawah (seperti sapuan nasofaring atau orofaring, kahak, aspirasi saluran pernafasan bawah, lavage bronchoalveolar, dan aspirasi nasofaring) yang diambil daripada individu yang disyaki COVID-19 atau dari individu tanpa gejala tetapi mempunyai kaitan risiko atau sebab lain untuk mengesyaki jangkitan COVID-19.
2. RT-PCR melibatkan teknik ujian molekular dan amplifikasi virus yang mana jangkitan COVID-19 boleh dikesan walaupun dengan jumlah *viral copies* yang rendah. **Ujian RT-PCR bagi COVID-19 mempunyai sensitivity dan specificity hampir 100% dan merupakan ujian gold standard bagi COVID-19.**

3. Ujian RT-PCR dan RTK Ag bagi COVID-19 juga bergantung kepada tahap kompetensi anggota dari segi teknik pengambilan sampel yang betul, penyimpanan sampel dalam suhu yang tepat semasa penghantaran sampel ke makmal serta kemudahan fasiliti makmal yang baik bagi memberikan interpretasi keputusan yang tepat.

Tuan Yang di-Pertua,

4. Tahap kompetensi di kalangan anggota KKM sentiasa berada di tahap yang terbaik. Beberapa sesi latihan kepada petugas telah dijalankan sama ada di lapangan dan di dalam makmal bagi memastikan teknik pengambilan sampel, penyimpanan & penghantaran sampel serta pengujian sampel di makmal memenuhi *Standard Operating Procedure* yang dinyatakan di dalam Garis Panduan Pengurusan COVID-19 di Malaysia No.5/2020.

5. Sesi latihan yang dijalankan ini mampu mengurangkan risiko kemungkinan cross contamination terhadap sampel yang diambil atau yang sedang diuji yang memungkinkan penghasilan kepada keputusan *false positive* ujian berkenaan.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK WIRA DR. MOHD HATTA BIN MD.  
RAMLI [ LUMUT ]**

**TARIKH : 24 NOVEMBER 2020 (SELASA)**

**SOALAN**

**DATUK WIRA DR. MOHD HATTA BIN MD. RAMLI [ LUMUT ]** minta **MENTERI KESIHATAN** menyatakan apakah pelan jangka panjang Kementerian untuk menyelesaikan isu pegawai kontrak UD41 selain memberikan mereka gred sementara iaitu UD43.

**JAWAPAN**

**Tuan Yang di-Pertua,**

1. Kerajaan dari semasa ke semasa berusaha untuk menyelesaikan isu-isu berbangkit berkaitan dengan pegawai di Kementerian Kesihatan Malaysia (KKM) berdasarkan kepada dasar-dasar dan peraturan yang berkuatkuasa.
2. Antara langkah yang diambil adalah KKM sentiasa berusaha untuk meningkatkan bilangan perjawatan Pegawai Perubatan dan melantik pegawai secara kontrak menerusi permohonan kepada Agensi Pusat. Usaha untuk menambah perjawatan ini walau bagaimanapun **bergantung kepada keperluan sedia ada dan baharu di fasiliti kesihatan serta keupayaan kewangan Kerajaan, bukannya bergantung kepada faktor jumlah keluaran graduan.**
3. Manakala, langkah Kerajaan melaksanakan **lantikan kontrak merupakan salah satu langkah penyelesaian kepada isu perjawatan**

tetap yang terhad boleh diwujudkan berbanding dengan jumlah keluaran graduan yang sentiasa meningkat.

4. Kementerian Kesihatan sentiasa menghargai setiap pegawai yang berkhidmat dan berusaha untuk melakukan penambahbaikan terhadap laluan kerjaya bagi skim perkhidmatan yang terlibat, terutama bagi Pegawai Perubatan.

5. Salah satu penambahbaikan yang telah dibuat adalah, Kerajaan pada 13 November 2020 telah bersetuju dengan permohonan KKM untuk menyelaraskan perubahan gred pegawai perubatan kontrak yang berkenaan daripada Gred UD41 kepada Gred UD43. Pelaksanaan ini merupakan manifestasi keprihatinan Kerajaan terhadap pegawai dan selaras dengan prinsip *rate for the job* (dengan izin), urusan ini akan dilaksanakan setelah perkara ini dirujuk kepada Jabatan Perkhidmatan Awam dan Suruhanjaya Perkhidmatan Awam.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK MOHD. AZIS BIN JAMMAN  
[SEPANGGAR]**

**TARIKH : 24 NOVEMBER 2020 (SELASA)**

**SOALAN**

**DATUK MOHD. AZIS BIN JAMMAN [ SEPANGGAR ]** minta **MENTERI KESIHATAN** menyatakan adakah Kementerian bercadang untuk menambah baik fasiliti kesihatan (hospital dan klinik kesihatan) di Sabah dan mewujudkan lebih banyak makmal kesihatan khususnya pasca Covid-19.

**JAWAPAN**

**Tuan Yang di-Pertua,**

1. Kementerian Kesihatan Malaysia sentiasa berusaha menambah baik kemudahan kesihatan di seluruh negara Malaysia termasuk di negeri Sabah. Usaha-usaha menambah baik ini meliputi pembinaan fasiliti baru dan menaiktaraf fasiliti sedia ada. Sehubungan itu, **sebanyak 6 projek telah siap dalam Rancangan Malaysia Ke-11** iaitu:

- a. Menaik taraf Dewan Bedah dan Hemodialisis Hospital Papar, Sabah dengan kos sebanyak **RM11.09 juta**;
- b. Menaiktaraf Sistem Penghawa Dingin Hospital Sipitang, Sabah dengan kos sebanyak **RM5.85 juta**;
- c. Penggantian Lif di Blok Pakar Hospital Duchess of Kent, Sandakan, Sabah dengan kos sebanyak **RM1.625 juta**;

- d. Pembinaan Klinik Kesihatan Jenis 4 Dengan X-Ray dan Kuarters di Nabawan, Sabah (Skop Kuarters sahaja) dengan kos sebanyak **RM19.38 juta**;
- e. Pembinaan Klinik Kesihatan Jenis 4 dengan Kuarters di Telupid Beluran, Sabah dengan kos sebanyak **RM42.19 juta**; dan
- f. Pembinaan Kuarters Hospital Semporna, Sabah dengan kos sebanyak **RM7.62 juta**.

2. Selain itu, **terdapat 19 projek yang sedang dalam pelbagai fasa pelaksanaan**. Antaranya, 9 projek di peringkat awal pelaksanaan iaitu 3 projek naik taraf di hospital dan 6 projek pembinaan klinik kesihatan dan kuarters baru. Manakala, 10 projek di fasa pelaksanaan iaitu 7 projek naik taraf di hospital, 1 pembinaan pusat pakar pergigian dan 2 projek pembinaan kuarters bagi hospital. Usaha menambah baik failiti kesihatan akan diteruskan dalam Rancangan Malaysia yang akan datang berdasarkan keutamaan dan tertakluk kepada kemampuan Kerajaan.

3. Buat masa ini, terdapat **dua (2) buah makmal kesihatan sedang dibangunkan di negeri Sabah iaitu sebuah Makmal Molekular di Tawau dan sebuah Makmal Modular di Lahad Datu bagi membolehkan ujian pengesanan COVID-19 secara Reverse Transcription Polymerase Chain Reaction (RT-PCR) dijalankan**. Kedua-dua makmal ini dijangka akan dapat disiapkan dalam masa yang terdekat dengan kemampuan kapasiti sebanyak 200 sampel ujian COVID-19 sehari.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB DATO' ABDULLAH SANI B. ABDUL HAMID  
(KAPAR)**

**TARIKH : 24 NOVEMBER 2020 (SELASA)**

**SOALAN**

**DATO' ABDULLAH SANI BIN ABDUL HAMID [ KAPAR ]** minta **MENTERI DALAM NEGERI** menyatakan status siasatan kes kematian seorang anggota bomba, Allahyarham Muhammad Adib Bin Mohd Kassim yang terkorban ketika bertugas dalam insiden rusuhan di sebuah kuil pada 27 November yang lalu setelah proses inkues dijalankan ketika pentadbiran Kerajaan Pakatan Harapan yang lalu.



**JAWAPAN**

Tuan Yang Di Pertua,

Sebagaimana Ahli Yang Berhormat semua sedia maklum, Mahkamah Koroner Shah Alam yang bersidang pada 27 September 2019, telah memutuskan punca kematian anggota bomba, Muhammad Adib bin Mohd Kassim, bukanlah disebabkan kemalangan tetapi disebabkan perbuatan jenayah oleh dua (2) orang atau lebih suspek. Berdasarkan keputusan tersebut, PDRM telah menjalankan siasatan berdasarkan arahan Pejabat Peguam Negara dan mengumpul bukti-bukti yang ada untuk dikemukakan semula kepada pihak pendakwaan.

Kertas siasatan juga telah dirujuk semula ke Jabatan Peguam Negara (AGC) pada 23 Julai 2020 dengan cadangan-cadangan seperti berikut:

- i. Menuduh 12 orang suspek di bawah Seksyen 143 Kanun Keseksaan yang merusuh dan menyerang jentera bomba; dan
- ii. Mengadakan inkues semula untuk siasatan lanjut jika dipersetujui oleh Peguam Negara di bawah peruntukan Seksyen 339(2) Kanun Prosedur Jenayah.

Memandangkan sehingga kini Kertas Siasatan dan cadangan inkues semula berkenaan masih berada di AGC, saya tidak berhasrat untuk mengulas lebih lanjut isu inkues semula ini agar tidak mengganggu siasatan ataupun mendahului keputusan AGC.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB TUAN IGNATIUS DORELL LEIKING  
(PENAMPANG)**

**TARIKH : 24 NOVEMBER 2020 (SELASA)**

**SOALAN**

**DATUK IGNATIUS DARELL LEIKING [ PENAMPANG ]** minta **MENTERI DALAM NEGERI** menyatakan sama ada Program Back for Good yang dilaksanakan di Malaya untuk Pendatang Asing Tanpa Izin kembali ke negara asal secara sukarela boleh dilaksanakan di Sabah dengan arahan Pengarah Jabatan Imigresen Malaysia, Sabah yang diperuntukkan dalam Seksyen 64 Akta Imigresen 1959/63.

**JAWAPAN**

Tuan Yang Di Pertua,

Seperti yang dinyatakan oleh Ahli Yang Berhormat, kuasa untuk menguatkuasakan undang-undang keimigresenan di Sabah diterangkan dengan jelas di bawah Seksyen 64, Akta Imigresen 1959/63 iaitu tertakluk kepada pertimbangan dan persetujuan Kerajaan Negeri Sabah. Untuk itu, sebarang cadangan peluasan Program Pendatang Asing Tanpa Izin (PATI) Pulang Ke Negara Asal (Program *Back for Good*) yang telah dilaksanakan di Semenanjung Malaysia pada 1 Ogos 2019 hingga 31 Disember 2019 ke Negeri Sabah perlu dibincangkan dan dipertimbangkan secara bersama antara Kerajaan Persekutuan dan Kerajaan Negeri Sabah. Ini boleh dilaksanakan melalui platform sedia ada seperti perbincangan di dalam Jawatankuasa Pengurusan Warga Asing di Sabah (JKPWAS).

Komposisi JKPWAS yang merangkumi JKPWAS Induk yang dipengerusikan secara bersama oleh YB Menteri Dalam Negeri dengan YAB Ketua Menteri Sabah serta JKPWAS Teknikal yang dipengerusikan oleh YB Timbalan Menteri Dalam Negeri adalah merupakan platform terbaik bagi mencari penyelesaian berkenaan pengurusan pendatang dan orang asing di Sabah. Ini adalah kerana keahlian kedua-dua Jawatankuasa tersebut yang merangkumi penglibatan Jabatan/Agensi/Bahagian peringkat Persekutuan dan Negeri seperti Jabatan Ketua Menteri (JKM) Sabah, Jabatan Pendaftaran Negara (JPN), Jabatan Imigresen Malaysia (JIM), Polis Diraja Malaysia (PDRM), Majlis Keselamatan Negara (MKN) serta beberapa Jabatan/Agensi yang lain.

Dengan mengambil kira pembentukan Kerajaan Negeri Sabah yang baharu serta kepentingan keselamatan negara dan negeri Sabah khususnya, cadangan ini akan perhalusi dan dibincangkan tertakluk kepada hala tuju dan persetujuan antara Kerajaan Persekutuan dan Kerajaan Negeri Sabah yang baharu. Ini bagi memastikan setiap usaha yang dilaksanakan oleh Kerajaan dapat diterima dan difahami oleh semua pihak yang berkepentingan serta mengelakkan daripada isu pendatang dan warga asing terus membelenggu pembangunan ekonomi dan sosial di negeri Sabah.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN P. PRABAKARAN [ BATU ]**

**TARIKH : 24 NOVEMBER 2020 (SELASA)**

**SOALAN**

**TUAN P. PRABAKARAN [ BATU ]** minta **MENTERI WILAYAH PERSEKUTUAN** menyatakan apakah tindakan efektif yang telah dilaksanakan oleh pihak DBKL terhadap laporan isu banjir yang seringkali berlaku di kawasan persekitaran Kuala Lumpur terutamanya diseluruh kawasan Parlimen Batu yang terjejas.

**JAWAPAN**

Tuan Yang Di Pertua,

Untuk makluman Yang Berhormat Batu, sepertimana semua sedia maklum negara mengalami fasa peralihan monsoon yang bermula dari 24 September 2020 dan dijangka berterusan sehingga awal November 2020. Keadaan atmosfera yang tidak stabil dengan tiupan angin yang pelbagai arah dan perlahan menyebabkan aktiviti perolakan mudah berlaku. Corak cuaca secara amnya ialah hujan dan ribut petir pada petang dan awal malam di negeri Pantai Barat, pedalaman Semenanjung, barat dan pedalaman

Sarawak dan barat Sabah. Hujan lebat dan taburan hujan yang tinggi dalam tempoh singkat berpotensi untuk menyebabkan banjir kilat. Pelbagai usaha dan tindakan yang telah dilaksanakan oleh pihak Dewan Bandaraya Kuala Lumpur (DBKL) bagi mengatasi isu banjir di seluruh Kuala Lumpur. Kerja-kerja menaiktaraf perparitan sediaada seperti monsoon drain dan roadside drain. Disamping itu kerja-kerja pembersihan parit-parit awam dipertingkatkan supaya melancarkan aliran air. Berikut adalah lokasi-lokasi hotspot banjir yang telah diambil tindakan di Kawasan Parlimen Batu:

- 1) Persimpangan Jalan 46/10 dan Jalan 2/12 (SMK Batu Muda);
- 2) Jalan Taman Batu Muda berhampiran Gerai MPS;
- 3) Jalan Khalsa Taman Kaya;
- 4) Jalan Pipit, Taman Kok Lian; dan
- 5) Jalan Union 2 dan Jalan Union 3, Taman Union.

Kejadian banjir kilat di Jalan Tekukur, Taman Million, DBKL telah menyiapkan kajian dan pelan rekabentuk. Dokumen tawaran dijangka akan diiklankan pada Disember 2020 dan dijangka siap pada Oktober 2021.

## SOALAN NO : 52

Untuk makluman Ahli-ahli Yang Berhormat jua, bagi kerja-kerja pembangunan dan Infrastruktur (MRT) di kawasan Parlimen Batu, DBKL akan memantau dan menguatkuasakan supaya pihak yang terlibat mematuhi keperluan MASMA 2 seperti berikut:-

- 1) Kawalan tapak pembinaan dengan menyediakan silt trap bagi mengelakkan banjir lumpur;
- 2) Penyediaan *On Site Detention* (OSD) bagi memperlahankan air hujan sebelum mengalir ke peparitan awam.

Strategi bagi mengatasi banjir dilaksanakan secara berperingkat:-

- 1) Untuk pembangunan baru dan pembangunan semula hendaklah mematuhi keperluan Manual Saliran Mesra Alam (MSMA 2) seperti 'On Site Detention (OSD)' untuk memperlahankan air hujan sebelum mengalir ke peparitan awam;
- 2) Untuk kawalan tapak pembinaan sedang dalam pembinaan pula, pihak pemaju perlu menyediakan perangkap kelodak dan mematuhi garis panduan 'Erosion and Sediment Control Plan (ESCP)' berdasarkan keperluan MSMA 2 bagi mengelakkan banjir lumpur;
- 3) Kawasan Banjir sedia ada:-
  - Menaiktaraf perparitan sedia ada seperti parit induk dan longkang tepi jalan; dan
  - Tindakan pembersihan parit-parit awam secara berkala supaya tiada sekatan sampah sarap yang boleh menyekat pengaliran air.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB TUAN RAMKARPAL SINGH A/L KARPAL  
SINGH (BUKIT GELUGOR)**

**TARIKH : 24 NOVEMBER 2020 (SELASA)**

**SOALAN**

**TUAN RAMKARPAL SINGH A/L KARPAL SINGH [ BUKIT GELUGOR ]** minta **MENTERI DALAM NEGERI** menyatakan siasatan yang dibuat secara terperinci berkenaan isu penyebaran gambar-gambar wanita dan pornografi kanak-kanak dalam talian (online) melalui aplikasi Telegram yang tular baru-baru ini dan apakah langkah-langkah yang akan diambil bagi memastikan perkara sebegitu tidak berulang lagi.

**JAWAPAN**

Tuan Yang Di Pertua,

Untuk makluman Ahli Yang Berhormat, pihak Polis Diraja Malaysia (PDRM) telah menjalankan siasatan berhubung isu penyebaran gambar-gambar wanita dan pornografi kanak-kanak dalam talian (*online*) melalui Aplikasi Telegram yang tular baru-baru ini berdasarkan dua (2) laporan polis yang diterima iaitu:

- i. Pantai report 11962/2020, disiasat di bawah Seksyen 8 Akta Kesalahan-kesalahan Seksual terhadap Kanak-kanak 2017 [Akta 792] dan Sek 292 Kanun Keseksaan (Menjual, dan sebagainya, buku-buku, dan sebagainya, yang lucah); dan
- ii. Ampang Rpt 18666/20, disiasat di bawah Seksyen 5 dan Seksyen 8 Akta Kesalahan-kesalahan Seksual terhadap Kanak-kanak 2017 [Akta 792].

Berdasarkan siasatan yang dijalankan, PDRM telah membuat tangkapan ke atas seorang lelaki India yang disyaki terlibat dalam merakam dan menyebarkan pornografi mangsa/kanak-kanak India berumur 16 tahun. Kertas siasatan berkenaan telah dirujuk kepada Timbalan Pendakwa Raya pada 19 Oktober 2020 dan telah diarahkan untuk tuduh. Suspek telah dituduh di mahkamah pada 21 Oktober 2020 yang lalu.



**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATO' SERI HAJI IDRIS BIN JUSOH  
[ BESUT ]**

**TARIKH : 24 NOVEMBER 2020 (SELASA)**

**SOALAN**

Minta **MENTERI PERTANIAN DAN INDUSTRI MAKANAN** menyatakan apakah usaha Kementerian dalam memperkasa ekonomi berasaskan pertanian; khasnya dalam aspek pengkomersialan teknologi dan inovasi sektor pertanian dan agro makanan negara.

**JAWAPAN**

Tuan Yang Dipertua,

1. Pemerkasaan ekonomi sektor pertanian yang berlandaskan penyelidikan, pembangunan, pengkomersialan dan inovasi (R,D,C&I) adalah penting bagi mewujudkan industri agromakanan yang berdaya saing dan mampan. Ini secara langsung dapat memperkasakan ekonomi petani, penternak, nelayan serta usahawan industri makanan di samping meningkatkan produktiviti di sepanjang rantai nilai.
2. Kementerian melalui Institut Penyelidikan dan Kemajuan Pertanian Malaysia (MARDI) dan Institut Penyelidikan Perikanan (FRI) telah mewujudkan persekitaran yang kondusif bagi menyokong aktiviti R,D,C&I.

Ini meliputi aspek perundangan, pembiayaan, kepakaran serta kemudahan penyelidikan terhadap R,D,C&I dalam sektor pertanian dan agromakanan.

3. Dalam usaha pengkomersialan teknologi dan inovasi, Kementerian antara lain telah melaksanakan usaha-usaha seperti berikut :

- (i) Pemindahan teknologi kepada kumpulan sasar melalui agensi pengembangan seperti Jabatan Pertanian, Jabatan Perkhidmatan Veterinar dan Jabatan Perikanan;
- (ii) Kaedah perlesenan, peningkatan skala menggunakan *“technofund”*, *“incubator & test-bed”* dan konsultansi teknologi bagi teknologi yang dilindungi di bawah perlindungan harta intelek;
- (iii) Pembangunan modal insan melalui kursus dan latihan, seminar, khidmat nasihat teknikal dan penyebaran maklumat; dan
- (iv) Kerjasama strategik dengan pihak industri dan institusi penyelidikan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : TUAN SABRI BIN AZIT [ JERAI ]**

**TARIKH : 24 NOVEMBER 2020 (SELASA)**

**SOALAN**

**TUAN SABRI BIN AZIT [ JERAI ]** minta **MENTERI DALAM NEGERI** menyatakan jumlah tangkapan terhadap penyebar berita tidak benar di media sosial tahun 2020.

**JAWAPAN**

Tuan Yang Di Pertua,

PDRM melalui Unit *Police Cyber Investigation & Response Center* (PCIRC), Jabatan Siasatan Jenayah Komersil telah ditugaskan untuk membuat pemantauan di media sosial bagi apa-apa kesalahan berdasarkan peruntukan undang-undang Malaysia sedia ada. Laporan polis akan dibuat sekiranya terdapat *posting* yang menyalahi undang-undang termasuk penyebaran berita tidak benar. Kertas siasatan akan dibuka oleh pihak Unit Siasatan Jenayah Terkelas (USJT) D5 Jabatan Siasatan Jenayah Bukit Aman.

Bagi tempoh dari 1 Januari 2020 hingga 30 September 2020, sebanyak 600 kertas siasatan telah dibuka berkaitan kes-kes media sosial. Daripada jumlah ini, sebanyak 42 kertas siasatan telah berjaya dituduh, 100 telah di NFA (*no further action*), 16 telah di KUS (Kemas Untuk Simpan) dan selebihnya masih dalam siasatan.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : YB DATO' SERI HAJI ABDUL HADI BIN  
AWANG [MARANG]**

**TARIKH : 24 NOVEMBER 2020 (SELASA)**

**SOALAN**

**DATO' SERI HAJI ABDUL HADI BIN AWANG [MARANG]** minta **MENTERI SUMBER MANUSIA** menyatakan apakah kesan positif kepada kadar pengangguran dalam kalangan belia melalui pelaksanaan pakej rangsangan PRIHATIN, PRIHATIN PKS Tambahan dan PENJANA.

**JAWAPAN**

Tuan Yang di-Pertua,

1. Untuk makluman Ahli-Ahli Dewan Yang Mulia ini, Kerajaan telah berusaha untuk membendung penularan wabak COVID-19 dan juga impak kepada sektor ekonomi negara.
2. Bagi menstabilkan ekonomi negara dan juga membantu majikan yang terkesan dapat mengekalkan pekerja mereka, Kerajaan telah memperkenalkan beberapa inisiatif di bawah Pakej PRIHATIN, PRIHATIN PKS Tambahan, PENJANA dan Kita PRIHATIN.
3. Menerusi inisiatif tersebut di atas, kesan positif yang dapat dilihat adalah Kerajaan telah berjaya mengurangkan kadar pengangguran **termasuk kalangan belia** dari 5.3% pada bulan Mei 2020 kepada 4.7% pada bulan Ogos 2020. Keadaan ini dapat kita lihat di mana kes kehilangan pekerjaan turut menunjukkan penurunan setiap bulan bermula pada bulan Julai 2020 iaitu 16,660 kes. Rekod kehilangan pekerjaan paling tinggi dicatatkan pada bulan Jun 2020 iaitu **18,579** kes. Angka ini telah menurun setiap bulan dan pada bulan Oktober 2020, kes kehilangan pekerjaan adalah sebanyak **7,310** pekerja.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : YB TUAN HASSAN BIN ABDUL KARIM  
[PASIR GUDANG]**

**TARIKH : 24 NOVEMBER 2020 (SELASA)**

**SOALAN**

**TUAN HASSAN BIN ABDUL KARIM [PASIR GUDANG]** minta **MENTERI SUMBER MANUSIA** menyatakan adakah Kerajaan sekarang akan bersetuju dengan cadangan Kongres Kesatuan Sekerja Malaysia (MTUC) yang pada bulan September 2020 lalu menggesa supaya Kerajaan meneliti semula kenaikan gaji dan upah pekerja mengikut keadaan kos sara hidup.

**JAWAPAN**

**Tuan Yang di-Pertua,**

1. Pendapatan Garis Kemiskinan (PGK) merupakan salah satu indikator utama yang digunakan untuk mencadangkan kadar gaji minimum baharu. Kadar PGK sebanyak RM2,208 yang diumumkan baru-baru ini merupakan purata pendapatan bagi isi rumah. Manakala pendekatan penentuan gaji minimum mengambil kira purata pendapatan pekerja yang bekerja. Perubahan PGK juga akan memberi kesan kepada purata pendapatan individu pekerja bergaji rendah isi rumah. Justeru itu, kajian perlu dilakukan untuk meneliti lebih lanjut dari aspek demografi isi rumah individu pekerja dalam bergaji paling rendah bagi mendapatkan purata pendapatan sebenar pekerja bekerja yang memperolehi gaji minimum.

2. Selain PGK, Majlis Perundingan Gaji Negara (MPGN) juga menggunakan penengah gaji sebagai salah satu indikator asas penetapan gaji minimum baharu. Penengah gaji ini mencerminkan keupayaan majikan membayar gaji.

3. Di samping PGK dan penengah gaji, MPGN juga mengambil kira indikator-indikator sosioekonomi yang lain seperti kadar pengangguran bagi memastikan kadar gaji minimum tidak menjejaskan pasaran buruh. Produktiviti buruh turut diteliti dalam kajian semula bagi memastikan kenaikan gaji minimum selaras dengan peningkatan produktiviti. Selain itu, perubahan indeks harga pengguna juga memainkan peranan penting dalam kajian semula kerana ia mencerminkan perubahan kos sara hidup.

4. Untuk makluman Ahli-Ahli Dewan Yang Mulia ini, berdasarkan indikator-indikator sosioekonomi ini, penetapan kadar gaji minimum perlu melalui proses kajian semula, sekurang-kurangnya satu kali setiap dua tahun selaras dengan subseksyen 25(1) Akta Majlis Perundingan Gaji Negara 2011 [*Akta 732*]. Kajian semula ini juga akan dilaksanakan dengan mengambil kira impak pelaksanaan Perintah Gaji Minimum 2020.

5. Dalam menjalankan kajian semula, MPGN mengambil pendekatan seimbang (*balanced approach*) dengan mempertimbangkan kepentingan pihak majikan, pekerja dan kerajaan. Pendekatan sebegini penting agar majikan mampu melaksanakan kadar gaji minimum yang baharu dan pekerja dapat mengekalkan pekerjaan. Kenaikan gaji minimum dipertimbangkan berdasarkan indikator-indikator sosioekonomi dan petunjuk kajian impak perintah gaji minimum serta situasi pasaran tenaga kerja dalam mengesyorkan gaji minimum kepada Kerajaan.

6. Kenaikan kadar gaji minimum perlu dilaksanakan secara berperingkat agar tidak memberi tekanan dan membebankan majikan, terutama bagi perusahaan kecil, mikro dan sederhana. Kenaikan kadar gaji minimum yang mendadak boleh menjejaskan operasi syarikat, peluang pekerjaan baharu yang menguncup dan berkemungkinan pekerja akan kehilangan pekerjaan. Melalui pendekatan ini, Kerajaan percaya daya saing negara akan dapat dikekalkan di peringkat domestik dan antarabangsa.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : PUAN RUSNAH BINTI ALUAI  
[ TANGGA BATU ]**

**TARIKH : 24 NOVEMBER 2020 (SELASA)**

**SOALAN**

**PUAN RUSNAH BINTI ALUAI [ TANGGA BATU ]** minta **PERDANA MENTERI** menyatakan berapa jumlah yang telah dibelanjakan untuk membawa pulang pelajar-pelajar yang terkandas di luar negara di negara-negara yang terjejas teruk dengan COVID-19.



**JAWAPAN**

**Tuan Yang di-Pertua,**

Saya mengucapkan terima kasih kepada Yang Berhormat Tangga Batu atas pertanyaan yang dikemukakan.

2. Untuk makluman Dewan yang mulia ini, sehingga 23 November 2020, Kementerian Luar Negeri (KLN) melalui Perwakilan-Perwakilan Malaysia di luar negara dengan kerjasama agensi-agensi seperti Agensi Pengurusan Bencana Negara (NADMA) dan Kementerian Kesihatan Malaysia (KKM) telah membantu memudah cara kepulangan 26,870 orang rakyat Malaysia dari luar negara. Daripada jumlah tersebut, seramai 8,956 orang pelajar Malaysia persendirian telah berjaya dibawa pulang ke tanah air.

3. Dalam memudah cara kepulangan pelajar persendirian yang terkesan akibat pandemik ini, KLN telah membelanjakan sebanyak RM888,181.07 dengan menggunakan peruntukan yang disalurkan oleh Kementerian Kewangan kepada KLN melalui Surat Kuasa Belanja (SKB) RM25 juta antara Mac hingga November 2020. Perbelanjaan ini meliputi pembiayaan kos makan minum, pengangkutan serta bekalan keperluan asas yang lain termasuk perubatan, pelitup muka dan cecair nyahkuman.

4. KLN senantiasa memantau perkembangan rakyat Malaysia di luar negara yang terdiri daripada pelbagai latar belakang. Ini adalah bagi memastikan agar keselamatan, kesihatan dan kebajikan mereka sentiasa terjaga. KLN turut mengambil langkah-langkah proaktif sebaik mungkin bagi menghulurkan bantuan kepada pelajar di luar negara yang memerlukan. Bagi memastikan objektif ini tercapai, pelajar dan mana-mana rakyat Malaysia yang memerlukan bantuan di luar negara dinasihatkan untuk terus berhubung dengan Pejabat Perwakilan Malaysia agar bantuan sewajarnya dapat diberikan dengan segera.

Sekian, terima kasih.